

KWĨYĨBWA KWAMWĀMBĒPO



Lilino une ngwitika, lilino une ngwitika,
Fyosa ifindu fibagile, lilino une ngwitika;
Lilino une ngwitika, lilino une ngwitika,
Fyosa ifindu fibagile, lilino une ngwitika.

² Unko uswe tusyāle twīmīlile itolo pakabalilo lilino ku Lisyu lya Ntwa. Unko uswe tusanukile kwa Amosi, u nsololi Amosi, untu gwa 3, ukwānda ni lināndi lya 1.

³ Une ngulōnda ukupālisya Kalumbu Juanita kangī Anna Jeanne na Kalumbu Moore, panongwa ya bukobelo bwa nyīmbo ubumogi bula. Ikyēne kyālindwēle une kunyuma, bo une nālītūgēsye ukukilania kula nukupilikisya ku kēne. Une ninogonāga, akabalilo kāko abēne bāli na uswe, bikwimba mu lusasano, Nkundwe Jack na une twayobāga, abalindwana bala bāli balindwana banini, itolo balindwana banini kalongona-ntāndatu, ikindukimo bo ikyo, ndindwana. Lilino, une ngwīnogōna, Kalumbu Anna Jeanne ali na bāna bahano, kangī Kalumbu Juanita alinabo—alinabo. . . u māma gwa bāna babili. Kangī uswe naloliloli tuli kifuki fiyo ku bwīngilo bwa lisuba, bakīkulu, ukukinda mūmo uswe twāli akabalilo kala, ukufwana ifyinja kalongo na ntāndatu ukukīndāna. Patisakuya patali, uswe twisakukilania kula, akabalilo kalwimiko kala.

⁴ Lilino mwa Amosi u ntu gwa 3, unko uswe tubāle.

Pilika i lisyu ili u Ntwa ayobile ukulwāna na umwe, O bāna ba Israeli, ukulwana ni kikolo kyosa iki une nātūwēle pala. . . ukufuma ku Igupto, nguyoba,

Umwe mwībēne mbāmēnye Une. . . ifikolo fyōsa ifya kīsu: polelo Une nisakufūndaga umwe panongwa. . . ubwīnu ubutulwanōnga.

Ngimba babili babagile ukwēnda palikimo, pene pāpo abēne bītīkisēnie?

Ngimba i ngalamu yisakubūna mmatēngēle, akabalilo kāko yibōmbīle yēgīle akakukola nakamo? ngimba ingalamu ingeke yisakulila panja pa mbako, linga umwēne akēga nakamo?

Ngimba injuni yibagile ukugwa ndutāmbō pa mfu, mūmo sikayamo iseke kuli umwēne? ngimba yumo isakupikulāga mmwānya u lutāmbō ukufuma pa mfu, kangī bo ēgīle nakimo ukufuma ku lwēne?

Ngima i ngangabwīte yikupūtīgwāga nkāya, kangī abāndu balīngayaga bikutīla? ngimba mwisakuyamo ikībībi nkāya, kangī u NTWA nalōli akakībōmba ikyēne?

Naloliloli u Ntwa... atisakubomba nakimo, loli umwene ikusetula ifyakubutitu fyake ku babōmbi bāke a basololi.

I ngalamu yibōmbile yibunile, ywāni atisa kutīla? u Ntwa... abōmbile ayobile, ywāni abagile lōli ukusolola?

Unko uswe twīnamisye imitu gyitu.

⁵ Ntwa Yeso, tukulāmba iki, i Lisyu Lyako, Ntwa, tuliyaga uswe nubulilanisi ikilo iki ukusyūngutila akayabo aka. Uswe tukusuma, Ntwa, ukuti Ugwe kutupaga uswe inongwa ku lisimbo, ukuti uswe twisakwēga ukufuma apa, kangī ikyēne kilitwālāga ulugīndiko kwa Ugwe. Tusayaga uswe bo uswe tukugūlila, Ntwa, ikilo iki, pa Lisyu Lyako. Bumbulusyaga ababine na bonywa. Pokaga abayōnge. Paga amaka gu bōnywa, Ntwa, aba bikuya bōnywa, mosa-mubili mumbili kangī mwambepo. Kangī tupapo uswe ukonelēla ukukulumba kwa Kuyapo Kwako, kabuno uswe tukusuma ikyene mu Ngamu ya Yeso. Amenī.

⁶ Une ngunyonywa ukwēga ubusīmbe, ukufuma ku iki, ikilo iki: *Kwīyībwa Kwamwāmbēpo.*

⁷ Komma ukwībwa, kilabo, ulwene lo lwīpūto lwa babīne kilabo. Uswe tukugulila u Ntwa ukubomba ifindu ifikulumba, kilabo pamusi pa sala ya bubili, kuko uswe... akabalilo kako uswe tukwānda ubulumbilili bwitu. Undumiana isakuyaga apa ukupa amakadi ga lwiputo. Kangī aligwēsa isakwiputilāga aba bikulōnda ukwīputilīgwa. Kangī uswe tukugūlila akabalilo akakulumba, kilabo, mwa Ntwa.

⁸ Lilino umwe bandu muli apa, mukuyāta ukufuma panja pa kāya. Kumbukilaga, filipo ifinunu, ifipānga ifya Nongwainunu yōsa mōsa ukukīnda nkāya. Umwe mwāmbililīgwe ku fyōsa ifya fyēne.

⁹ Une nayobaga itolo ku yumo mwa batīmi ababōmbelalumo bāngu, panja, ikwingila itolo, Nkundwe Jackson, kubwāndilo kyāli kipānga kya kiMethodisti, ukufuluka a kāya pamo tubili pāsi pa uswe.

¹⁰ Kangī balinga aba bali apa aba bikubōmbēlalumo ni kipanga, unko uswe tukēte amaboko ginu, kulikosa. Mwe, une naloliloli—naloli nhobwike ukuya na umwe pāsi. Ulu lo lukomano lwakifuki ukukinda syosa isi une njilēko ku Indiana pa kabalilo katali. Une ngwinogona isya kugomokela, lululu ulu, nukusumusya mmwanya i kihēma nukuya ni Ngangabwite ihano-na-ibili sila isyabumalikisyo, u Ntwa īganeege.

¹¹ Polelo, lilino, loli kumbukilaga kilabo. Komma ukwiibwa ikyēne, kilabo pa sala ibili. Kangī, lilino, ububōmbelo bwītu bwīsa kwānda undungu ugu gukwīsa, mu Tampa, Florida.

¹² Lilino une ngulōnda ukuyoba pa: *Kwīyī... Kwīyībwa Kwamwāmbēpo.*

¹³ Lilino, umwinitu unnini uyu uyu uswe tukuyobapo, Amosi, itolo ku kabalilo, ukwèga ulwālo lwītu bo tukāli uswe ukwèga ubusímbe bwītu. Aka kāli kabalilo ka bukabi ubukulumba mu Samaria. Israeli ākabīle. Abēne nalolilōli bābūkīle ukukōnga i kīsu kangī bākabile.

¹⁴ Komma akabalilo kosa ubukabi bo kimanyilo kya sayo syamwāmbèpo, lōli utubalilo tumo pa bukīndāne. Abāndu bikwinogona lumo ugwe kufimbilisigwa ukuya nafyo ikilūndiko kya ifyombo fyankisu, kangī kikubonesya ukuti Kyala yo ikukusaya ugwe. Ikyo kikaya kyābwanalōli. Utubalilo tumo ikyēne kyo njila iyingi.

¹⁵ Loli uswe tukwaga, umwene, uswe tutikumanya fiyo isya mwinitu unnini uyu. Umwene, uswe tukaya nasyo isyambukulu, kūko umwene ikufumilako. Uswe tumenye umwene, ukufwana ni Lisimbo apa, umwene yo ntima-fitimo, lōli Kyala ālinsūmwisye umwene mmwanya.

¹⁶ Une mbagile ukwinogonela ngukēta, ilisiku limo ilipyāno mu Samaria mula, kamo mwa twāya utukulumba utwabayāti utwa nkīsu ku lisiku lila. Kyo kindukimo pa lubatīko lwa, uswe tubagile ukuyobaga, Miami, pamo—pamo Hollywood, Los Angeles, gamo mwa mabuyo ago bo gala, amabuyo gamo amakulumba kuli abayāti. Kangī uswe tubagile itolo ukwinogonela tukumbona umwēne. Umwene akālimo siku nkaya bo aka. Lōli, umwēne āli ni Lisyu lya Ntwa, umwēne īsaga ku kāya akakulumba aka kūko ubutulwanōngwa bwālūndikigwe pa lubafu lulilōsa. Abalumbilili baasokilemo mu Lisyu lya Kyala, kangī abēne bakāli nayo unsololi mu fyinja fingi.

¹⁷ Kangī polelo umwinitu unnini uyu, bo umwene ikufyūka a kamba, itolo mu luko lwa kululu lwa Samaria, une mbagile ukwinogonela ukunkēta umwēne, ilisuba ilipyano likumulika pāsi, kangī indefu syake isyambuha pamwanya pa kisyo kyake, kangī ifisīge fyāke ifinini fyāning'īle, kangī ugwāke unnini, untu ugwākipāla gulinkumulika, bo umwēne ākētāga pāsi pamwanya ka kāya kala. Kangī ifisīge fyāke filinkuning'a. Umwēne akākētāga ku ifi abayāti bwīla bikukēta, ukubūka ku kāya kamo nukukēta fyōsa fya kwīsangulusya fyāke ifya bumogi. Umwēne alinkukēta nukukēta kyo kyakukēta nki iki a kāya kala kālisile ukuya, a kāya aka akabalilo kamo kāli kāya ka Kyala, kangī kāfikile ukuya mbuhūni ububole ubwa luko bo ubo. Fyōbēne . . .

¹⁸ Uyu unnini, unsitakumanyigwa umwīnitu āli Amosi u nsololi. Kangī lilino uswe tukamanya fingi fiyo ifyakufwana nu mwēne. Uswe tukamanya kūko umwēne āfumileko. Abasololi bwīla bikwīsa pa buyo, basitakumanyigwa, bikusōkāpo injila yilayila. Uswe tutikumanya kūko abēne bikufumilako, kuko abēne bikubuka, tutikumanya isya lwalo lwabo. Kyala itolo ikubafyusya abēne mmwanya. Umwene akaali fingi-fiyo

mma ukunketa, loli umwene aali na ISI SYO IKUTI U NTWA. Ikyo kyo kindu ikinywamu fiyo iki une nguketa. Ena, umwēne isile ku Samaria ukwānda nukwanda ulusasanio lwake. Une nsisimikisye umwene akāli nu bwītikisanio ukufuma kwa nayumo. Umwēne akāli ni likādi lya bulilanisi ukufuma ku kipānga-kipāgūke kilikyōsa. Umwēne akāli nafyo ifyakumbagilila ukunāngisya kibugutila nki umwēne āfumilēko. Kangi, lōli, umwēne āli ni kindu kimokyene, umwene āli ni Lisyu lya Ntwa kuli kāya kala.

¹⁹ Kangi une nguswīga, linga uswe twābagile ukumpimba Amosi, umwīsyūgu, ukusuluka ku kabalilo kītu, une nguswiga linga umwēne ikwambibilīgwaga nkāya kītu umwīsyugu. Une nguswiga linga uswe twābagile ukummwambilila umwēne, pamo ngimba uswe tukubombelaga itolo bo abene bābombile. Uswe tukwāga utwāya twītu nkati mbubōle bulabula. Kangi uswe tukwāga ukuti ubutulwanōngwa bo itolo bukulumba pakati pa bāndu, bo ubwēne bwāli akabalilo kala. Kangi une nguswīga, linga uyu unnīni, unyāmbala unsitakumanyigwa, bulebule umwēne isakwāndāga ulusasanio lwāke? Bulebule, kūgu ngimba umwēne isakwāndilāga? Kyo kipānga nki umwēne ikubūkako, pamo ywāni isakwitikisaniāga nu mwēne? Umwēne akāli nako nakamo akakubonesya kuko umwene afumilaga, umwene akāli nakyo nakimo na panandi loli ISI SYO IKUTI U NTWA kuli a kāya kala.

²⁰ Umwēne ābāgile abēne babolile fiyo kangi fiyo babolano ndwīho, akēne kāli kabalilo akakulumba. Abakīkūlu nkāya kala bālisile ukuya kifuki bo abene bali mu United States. Abene bālisile ukuya babōle. Kilikyosa iki Kyala āsubilaga ukufuma ku bene, abene bābūkile kulakula injila iyingi. Kangi—kangi uswe tukwaga ukuti ubwene bwali buyo ubukulumba kūko abēne bāli ni fimogo pa lukindi, abakīkūlu nubuhuni bikufūla imyēnda gyābo, na fyōsa bo ifyo, ngati fula-ūgila. Ena, kila kyāli kisangalusi kyapakilūndilo mmasiku gala, lilino ikyēne kyo ilisiku lililyōsa. Itolo unko ubukye buye bupyāno, kangi ugwe utikulōndigwa ukubūka ku kyakubonesya kilikyōsa. Abēne bo bali mōsa pa lukīndi, kulikōsa, mulimōsa. Isoni pa umwe bakikulu, ukubomba ikindu bo ikyo! Ngimba ugwe ukaya ni soni pa gwimwene?

²¹ Kangi polelo—kangi polelo une ndinkuyoba ikyo ku nkīkūlu apa, pakaya patali mma, kangi umwene alinkuti, “Fiki,” umwēne alinkuti, “Nkundwe Branham,” alinkuti, “ikyo, ikyo kyo—ikyo kyo itolo bo bosa abakīkūlu.”

²² Une ndinkuti, “Loli uswe tutikulondigwa ukubombela bo abandu balibosa mma. Uswe tukīndēne. Uswe yūswe u—u būndu bukīndāne.”

²³ Kikungumbusya une isya nkikulu, alinkuti, “Ena, Nkundwe Branham,” uyungi yumo alinkuti, “Une—une—une ndikufwala i bundu sila.” Alinkuti, “Une ngufwala isulubali.”

²⁴ Une ndinkuti, “Ikyo kyo kibibipo.” Uu! “Kyala äyobíle, ‘Ikyène kyo mwiko,’ mmaso Gåke, ‘kuli unkikulu ukufwala umwenda ugwakufwana bo unnyambala.” Uko ko katikati kutalusya.

Yumo alinkuti, “Ena, abène batikupela imyenda igĩngi mma.”

“Abène bakāli bikutëndéka amakina ga kusonela nukuya ni findu.”

²⁵ Kukayapo nakumo ukulēya. Ikyene kyo itolo iki kili mu ndumbula. Ikyo kyo iki kikunāngisya panja. Ikyene—ikyene kikwilingania kyene.

²⁶ Kangi lilino uswe tukwāga, nkāya aka, akēne kālīsile ukuya kabole ndwīho. Abalūmbilili bātīlāga ukuyoba kalikōsa akakufwāna ni kyēne. Kangi, loli abene bāli na kanini, aka akinitu akanini akaiyolo aka kakufyuka pa kām̄ba, kīsāga ukubabūla abēne ISI SYO IKUTI U NTWA, “Pyāgila ikīndu iki mōsa, pamo umwe mwisakubūka mbutumwa.” Kangi umwene āli nu būmi ukukēta amasiku ga busololi bwake bufwanikisigwe. Umwēne āsolwile mmasiku ga Jeroboamu u Gwakibili, uyu yo āli itolo ntagigwe-pānja, mulimōsa; umwēne—umwēne afiganile ifikolo ifingi. Kangi—kangi unnini uyu Amosi āsolwile nukubabula abene, umwene alinkuti, “Yu Kyala yulayula uyu umwe mukwiyobela ukumbombela imbombo, Umwene isakubonanga umwe.” Kangi Umwene ābombile.

²⁷ Kangi linga a masyu gake gikuyaga apa ikilo iki, mu . . . mu Birmingham, iliyene āngali likufumusya ikīndu kilakila ku fipanga. “Yu Kyala yulayula uyu ugwe kwīyobēla ukuya ukumbōmbile, isakubōnangāga umwe ilisiku limo.” Une ndikuyoba ku kilundilo iki apa. Amatepi aga gikubuka ukusyungutila ikisu. Lilino, kumbukilaga, ikyo kyo kyabwanaloli.

²⁸ Polelo umwene alinkusyagania, akabalilo kako umwene isege nkaya, ukuti umwene . . . ifindu fyosa ifi, une nguswiga mumo umwene ābagile ukwipilikila ukukēta nukububona ububole bula ubwa bāndu ba Kyala, kwa bābo umwēne ātumīgwēko.

²⁹ Une nguswiga linga uswe twābagile ukummwambililaga umwene lilino? Linga umwēne ikwisaga, angali uswe—ngimba uswe tukumbombelaga-palikimo nu mwēne? Ngimba uswe twābagile ukumpa umwene ubu—bwitu ubununu ukukinda bosa? Ngimba uswe twābagile ukumpa umwene ubutego bwitu? Ngimba uswe āngali tukupīndūkāga linga umwēne ātubūlile uswe ukuti uswe tukufimbilisigwa ukugomokela ku Lisyu lya Ntwa kangi ukubōmba injila iyi u Ntwa äyobíle?

³⁰ Une nguswiga iki abakalumbu bitu bābagile ukubomba ukufwana ni nywili syabo isengigwe? Ngimba abēne āngali bikusileka inywili syābo sikule kāngi, linga Amosi isile pala?

Umwene āngāli ikulumbilila ikylene, kangi une ngubabula umwe ikyo, panongwa yakuti ilyo lyo Lisyu lya Ntwa.

³¹ Une—une nguswīga linga abītu—abītu abalindilili aba bikubīka pala abadiakoni, aba bēgile katatu pamo kana, kangī—kangi na fyosa bo ifyo, nukugela ukuya badiakoni, une nguswīga linga ifindu fyōsa ifi, Une nguswīga iki umwene abagile ukubomba ku nnyambala uyu ābagile ukumwitikisya unkasi gwāke afwalege ibundu nukusoka panja mu lukindi panja pala, nukusēnga ulubīngilo, pānja mu lubīngilo, akabalilo kāko abanyāmbāla bikukīsānia? Une nguswīga iki umwēne āngāli ikuyoba ku nnyāmbāla bo uyo?

³² Umwene naloliloli āngāli ikulūnduma ikylene na fyosa ifi fyāli mwa umwene, kabuno umwene āli na ISI SYO IKUTI U NTWA, kangī umwene alinkutoligwa ukubomba nakimo loli kila. Umwēne ābāgile abēne mu lisiku lila ni nōngwa imbībi iya mbūngo yimo, ukwīyībwa kwāmwbēpo, kangī ikyo kyo itolo katikati iki uswe tuli nakyō umwīsūgu.

³³ Lilino, ngimba umwēne āmēnye bulebule iki kyāyāga pakuboneka? Ngimba Amosi āngāli ikumanya bulebule? Ikyākwaṅda, umwēne āli nsololi. Kangī, ikīndu ikīngi, umwēne āmēnye ukwīsila mu mbūngo iki ubulīngānio bwāli, kangī umwēne ābagile ukumanya iki ikyakukōnga kyāli.

³⁴ Līnga u ngānga ikukēta pa bwīsūle kangī ikukēta ukuti ukyakwīsila kila kibōmbile kyēgile ubukolelelo, umwēne amēnye kikayapo nakimo lōli ubufwe busyēle. Ikyo kyo kyōsa, pene pāpo Kyala ikubōmba ikindukimo ikya ikyēne.

³⁵ Ena, akabalilo kāko ugwe kukēta ku kāya, kangī ugwe kukēta ku bandu, ugwe kukēta i kipanga, kangī kēta ku bandu aba bali kubutali fiyo ukufuma kwa Kyala, kikayapo nakimo lōli ukwāga lōli, “Butulwanōngwa! ‘Kangi imifwālo gya butulwanōngwa bo bufwe.’ Ikyēne kikufwa.” Ubwāgambūngo bukusisimikisya iki ikyēne kili. Umwe mukētile, akabalilo kāko abandu bikusōkako kwa Kyala kangī batisakupilika ku Lisyu, bakaya nu kinyonywo kāngi mma kuli i Lisyu, polelo bulipo ubwāgambūngo bumobwēne ku kyēne, “‘U moyo ugu gukōnānga, u moyo gula gwisakufwa.’ Ukusitakwitika kwīsa kukupāgūla ugwe ukufuma kwa Kyala.” Uko ko katikati kotalusya.

³⁶ Ukuti, umwēne āmenye iki imbūngo, iki ikyākukōnga kyāli, akabalilo kāko umwēne āyibwēne i mbūngo ya—ya butulwanōngwa nkāya kala.

³⁷ Lilino, ikwīyībwa uku, uswe tukubūligwa ikyēne kyo i—i—i...kukupela ugwe ukuya ku buyo kūko ugwe ukabagīla ukwīlīngānia gwīmwbēne. Lilino, ikyēne kyo kīndu ikisitakwīsibiligwa. Ikyēne kitikuboneka kingikingi fiyo mma, lōli ifyakupela fyō fikufuma ku lunyomoko. Ikyēne kyo munduyumo uyu atikumanya nāyūyo umwēne ali. Ugwe

kukyaga icyene ukufuma ku mabwĩte, utubalilo tumo, abasikali bikukyega icyene. Utubalilo tumo a bandu bikukyega icyene. Ikĩndu ikĩngi kikupela icyēne, kyo kupāsyā. U kupāsyā kwĩsakupela icyēne.

³⁸ Ukupāsyā kukaya nabumo nu bunoge ku kyēne, na panandi. Ena, itolo—itololo—itololo nyēla u kupāsyā, kangi itikisyā u lwĩtiko.

³⁹ Yumo alinkuti, “Mulimōsa, lilino, bule linga ugwe kuyaga pakutusuliligwa ndubunju, ngimba ugwe ukābagile ukupasya?”

Une ndinkuti, “Umma, komma ukwinogona lulo.”

“Fiki?”

Une ndinkuti, “Ukupasya kukābagile ukubomba akandu kamo lōli kukundēndēka une ukuya mbubibipo.”

“Mulimōsa, kyo kinununki iki icyene kikubombaga ukuya nu lwitiko?”

Une ndinkuti, “Ikyene kibagile ukūmboñesyā une.” Kangi uko ko kotalusyā, muketile.

⁴⁰ Popāpo ukupāsyā kukaya nu bunoge nabumo kuyēne, na panandi, lōli ulwĩtiko luli nu bunoge. Itika!

Lilino ukupāsyā utubalilo tumo lukupela icyēne.

⁴¹ Kangi ikĩndu ikĩngi iki kikupela icyēne nkati mbāndu, kyo ukuya pakati pa mĩnogòno mabili. Ikyo kĩsakupela u kwĩyĩbwa. Kangi icyēne kikufikisyā ugwe pa buyo kūko ugwe—ugwe, nalolilōli, iki ugwe ubōmbile, ugwe utagile ubwĩnogonelo bwāko. Ugwe utagile aminogono gako. Ugwe ukabagila ukutendeka... Ugwe ukamanya ukuti ugwe gwe ywani. Ugwe ukabagila ukwilingania gwimwene. Ugwe ubagila ukwendendeka ukusyungutula, ukulya na filifyosa, loli, ugwe, pópe ugwe ukabagila ukwilingania gwimwene. Ugwe uli nabo ubumanyi bwāko bwāsukulu, ugwe ukabagila... ubumanyi bulabula ugwe gwāli nābo, lōli ugwe ukamanya kūko icyēne kifumileko, ugwe utikumanya ukuti ugwe gwe ywāni, kūko ugwe kumyāko kuli. Ikyo kyo kwĩyĩbwa, momūmo uswe tubūligwe.

⁴² Uswe tukulĩnganisigwa ni fikolo fyĩtu, mbūmi bwa būndu ubu, ukwĩsila mbwēgi. Kangi na bakasi bĩtu, uswe tukwēga, kangi ifikolo fyĩtu fikulĩnganisigwa ukwĩsila mu bumobwēne bwa bwĩtu—bwĩtu—bwĩtu ubwēgi. Kangi polelo, kyo kiliku ukwinogona, bule linga ikĩndu ikinyali iki kikubonekaga kwa ugwe kangi ugwe ukabagilaga ukukumbukila uyu ugwe gwālyēgēne, ywāni u nkasi gwāko, bo baliku abāna bāko, ywāni yo gūso kangi nyōko, yo ywāni umpalamani gwāko? Ikyo kikuyaga i—i kindu kibibi.

⁴³ Polelo uswe twe tulinganisigwe, kangi, tubagile ukwilingania twibene mu luko lwa bandu, ukwisila ukuya na mahala kangi—kangi ukuya nkĩndāne ukufuma ku būmi bwa finyamana. Ikinyamana kikabagila ukwinogona, umwene itolo ikubūka ni fyōgo. Umwēne akaya nu moyo. Kangi, lōli,

uswe tuli būmi bwa kinyamana. Iki kikutupela uswe ukuya bakīndāne. . . Uswe twe bālibéle, lōli fiki. . . Ikyālibèle kila kyo kinyamana ikilūngule-lilopa, kangī uswe tuli mbubonekelo bwa kinyamana. Loli iki kikutupela uswe ukuya bakindane, uswe tukulinganisigwa ukuya nu moyo, amabyebye aga gikutubūla uswe iki kyo kitalusye kangī kisobi.

⁴⁴ Lilino apo po bulipo ubuyo, akabalilo kāko ugwe kwegā iki ukwīyībwa, ugwe ubagīle ukufika ngati Nebukadnezara, ikyēne kyāli, yūyo ālifyūsīsye mwēne akabalilo kamo, kangī Kyala alinkundeka umwēne īnogōne āli kinyāmāna kimo. Kangī umwene aalitūgēle mmatengele kangī—kangī ukulya ilisu bo ngambako. Kangī—kangī inywili syake—syake syākūlile ukusuluka umbili gwake, ukufwana mayoya ga swanga, kangī umwene alinkuya ndumbula ya kinyamana mwa mwene. Muketile? Kula kwāli kwīyībwa, panongwa yakuti umwēne ālibwībwe ukuti umwēne āli mwalafyāle. Umwēne ālibwībwe ukuti umwēne āli mūndu. Kangī umwene inogonaga ukuti umwene aali kinyamana, polelo umwene aabombelaga bo kinyamana, panongwa yakuti umwene aalibwībwe umwene aali mūndu.

⁴⁵ Ikyo kyo kipepe fiyo, umwisyugu. Kangī uswe tukwibwa, utubalilotumo, iki i Kipanga kya Kikristi kili. Uswe tukubombela bo kikisu kyapasi. Ikyo kikonāngisya ukuti uswe tuli nu kwīyībwa kwāmwāmbèpo, panongwa yakuti ugwe utikubōmbèla ngati Nkristi. Ugwe kubōmbèla ngati kīsu. Ugwe kwambilila i ndumbula ya kīsu, kangī ikyēne kikutēndēka iki.

⁴⁶ Apa uswe—uswe tukwāga ukuti Israeli āywēlwile, aywēluligwe ku kīsu, kangī āgwīle nkati mu nkolofwa gula. Kangī u nsololi uyu ātumīgwe ukubakumba abēne ukufuma mu kyēne, linga umwēne abagīle, nukubabūla abēne. Kyala, ukwisila mu lipyana Lyake, alinkusala Israeli ukufuma ku fyosa ifikolo. Ilipyana lyabombile ikyo. Umwēne ābapēle abēne ifīsu ifisalīgwe. Umwēne ābapēle abēne imiyūmba igi abēne bakāfimbilisigwēmo ukuyēnga siku. Kyala ābōmbile ikyo, ābasalile abēne. Umwēne ābapēle abēne imigūnda igi abēne bakālyūlilēmo siku. Umwēne—Umwēne ābapēle abēne, Umwēne ābapēle abēne ifyākūlya ifi abēne bakabyēlēmo siku. Umwēne ābapēle abēne ifisiba ifi abēne bakākūmbilēmo siku. Umwēne ābapēle abēne amabupōnjōli aga abēne bakapōnjwīlēmo siku. Umwēne ābapēle abēne ilipyāna ili abēne bakabagilīlēmo siku. Kyala ābōmbile ikyo ukwīsila mu ipyāna Lyāke kuli abāndu bāke, Israeli, Gwāke unsalīgwa, Gwāke unganigwa.

⁴⁷ Kangī Umwene alinkuti, mu li Bangeli, “Umwene alimmwagile umwene mu ngunda, ukuya ndindwana unnini itugele mu lilopa lyake lyene, kangī Umwēne āmōsyāga umwēne nukunsuka umwēne mōsa, kangī iki Umwēne ābōmbīle. Lōli bo Kyala anāngīsye ifisa fyōsa ifi ku mwēne, umwēne alinkuya

nkabi,” umwēne alinkuya nu kwīyībwa, kwīyībwa, “kangi umwēne ālibwībwe fyōsa ifya kūko ifindu ifi fifumileko.”

48 Une ngwinogona ikyo kyo kifwāni kya U.S.A., 1964. Ikyēne kikubīlwa ni mbungo yilayila. Uswe twe fipanga ifikulumba ifyamaka. Uswe twe bandu bakulumba, abandu bamaka. Uswe tuli maelifu-elifu mu mbalilo, kangi uswe tukwibwa kūko ifindu ifi fifumileko.

49 Abēne bāli mbūngo imbībi ya ikyēne. Ukufuma pāpo Kyalā āli nnūnu ku bēne, nukubatwala abēne ukufuma ku fisu fyāpanja fyōsa, nukubapela abēne bāndu bapāgulīgwe, ukubapāgūlania abēne ku Mwēne. Umwēne alinkuti, “Umwēne ālyēgile umpesa ukufuma ku kīsu ikīngi kangi ābyēle ugwēne ukukilania nkīsu ikīngi, kangi mūmo Umwēne ākitēndekisye ikyēne ukusyūngūtila ukutēndeka ikyēne ukukusya ikipaso nukuya kya kupaseke, lōli u mpesa gula gwālibwībwe kūko isayo syāke sifumilēko.”

50 Momūmo babōmbile abāndu ba Kyalā, mmasiku aga agābumalikisyo, bībwībwe iki ubukēti bwa kuya Nkrīsti bukusanusya. Ikyēne kyo kāngi, ukwīyībwa uku kwisile ukuya pa bāndu. Abēne bakabagila ukwīlīngānia bēne.

51 Abēne, abēne bālibwībwe fyōsa ifya Ikyēne. Abēne bālibwībwe ubwīkēmo Bwāke. Abēne bālibwībwe u lulagīlo Lwāke. Abakikulu bitugasyaga bo balibosa ba bakikulu.

52 Kipanga kya Kyalā kangi abāndu Bāke akabalilo kōsa bāli, “Abāndu abapāgulīgwe, a—a bāndu abakōlelīgwe panja, abandu abaswigisye, i kikolo ikikemo, u bupūti ubwabunyafyale; kikupa amakemo gamwambepo kwa Kyalā, ifipaso fya milomo gyabo, ukupa ulutufyo ku Ngamu Yake.” Kyalā ākōlile i Kipānga Kyāke nukukipāgūla Ikyēne ukufuma ku kīsu, pa bubīngililo bula bulabula. Kangi Umwēne ākipēle ikyēne ululagilo, kangi Umwēne, Ikyēne, kikufimbilisigwa ukuya kīkēmo. Umwēne alinkuti, “Une ne mwikemo, kangi ugwe kufimbilisigwa ukuya mwikemo, kangi kisita bwikemo u mundu atisakumbona u Ntwa.” Kyalā āyobile ikyo, Mwene.

53 Kangi Umwēne ākōlile abāndu aba ukuya luko ulu ulwa bāndu, lōli abēne bālibwībwe isya ikyēne. Abēne bālibwībwe indagilo Syāke, kangi abēne bālibwībwe inyiho syābo. A bakīkūlu pānja mu likīndi, abakīkūlu ba kiIsraeli pānja pala, aligwēsa gwa bēne ikugūlila uku—ukuya bamelisīgwe na Mbepo Mwīkēmo, ukutwala panja u Mesiya, kangi polelo ukubombela bo lula. Akayilo kābo kāli kanyali.

54 Une ngulōnda ukwīma apa i miniti, ukuyoba ikyēne kyo kindu kilakila pakati pa bāndu bītu, umwīsyūgu, aba bikwikolela bene Bakristi. Akayilo kabo, linga umwe mubagile itolo ukusyagania!

55 Akabalilo kamo, m’Mwitongo. Une nābalile akapango ukufuma kuno, kuko abene bālīsibile ukuya na batumwa. Abēne

bābagile ukwēgá abāndu bala nukulisya abēne pa sokoni, itolo mūmo umwe mwabagile i ligali ilibōmbeligwèpo. Kangi polelo pala ālipo ugwakūla, unkyulusi, ābagile ukwīsa pala nukusalapo abatumwa bala nukukyulusya abēne, kangi itolo mūmo ugwe gwābagile iligali pamo ikindukimo.

⁵⁶ Kangi abatumwa bala bayaga kubutali ku kīsu kya kāya kābo. Abēne bāfumile ku Africa. Aba Boer babakamēte abēne, ukubatwāla abēne ukukilania kuno ku sūngo, kangi polelo ukubayōngēsya abēne mu United States nukubagulisya abene ukuya batumwa, ukufuma mu Jamaica nukusyungutila.

⁵⁷ Lilino uswe tukwāga ukuti abāndu bala bāsulumēnie. Abēne bāpokigwe ukufuma ku kāya kābo kēne. Abene basoosigwē pānja nu ndugu, kangi abene baasulumanie. Abēne bakābagilēmo siku ukumbona undume gwābo kangi mma, pamo unkasi gwābo kangi mma, tāta na māma, abāna bābo. Abēne bali naloliloli. . . Abēne bafimbilisigwaga ukubakoma abene, ni mikyāpi, ukubapela abene ukubomb’imbombo, kabuno abene bāli bandu basulumanie.

⁵⁸ Kangi ilisiku limo, inkyulusi ālīsile pala pa bubyāle bumo, umwēne ākibwēne ikipāmba kya batumwa pānja pala bikubōmba. Kangi umwēne—umwēne alinkwīngīla mula nukundālūsya mwenebatumwa, alinkuti, “Ngimba batumwa balinga ugwe uli nabo?”

Alinkuti, “Ukufwana mia yumo.”

Alinkuti, “Ugwe uli nabo balibosa aba ugwe ubagile ukūsania pamo ukulisya?”

Umwene alinkuti, “Ena.”

Alinkuti, “Unko une mbakete abene lōsa.”

⁵⁹ Kangi umwene alinkubuka panja mu ngunda nukubaketesya abene, kangi umwene alinkubabona abene bikufimbilisigwa ukubakoma abene ukusyungutila. Kangi ukukīndapo akabalilo, umwēne alinkukēta yumo u nnyāmbāla unkeke abēne bakāfimbilisigwāga ukunkoma. Umwēne āli ni kipāmbaga kyāke pānja kangi ikilefu kyāke mmwānya; bakāfimbilisigwāga ukunkōma umwēne. Popāpo unkyulusi alinkuti, “Une ngulōnda ukula untumwa yula.”

Kangi umwene alinkuti, “Loli umwene akaya pa bugulisi mma.”

⁶⁰ Umwene alinkuti, “Mulimōsa, ko kukindananki kwa ntumwa yula?” Alinkuti, “Ngimba u ntumwa yula yo bwāna pamwanya pa abāngi ba bēne?”

Umwene alinkuti, “Umma, umwene yo ntumwa itolo.”

Umwene alinkuti, “Mulimōsa, lumo ugwe kundyesya umwene nubukindane.”

Umwēne alinkuti, “Umma, umwēne ikulya mkolofwa na bōsa ba batumwa.”

⁶¹ Umwene alinkuti, “Mulimōsa, kyo kiliku iki kikupela umwene ukuya nkindane ku bosa abatumwa?”

⁶² Umwene alinkuti, “Mulimōsa, iki une nāswigaga, nīne, ku kabalilo katali. Lōli ilisiku limo une nāmanyile, ukuti, kula ku kīsu kyakukāya kūko umwēne afumile, tāta gwāke yo mwalafyale gwa luko lōsa. Kangi palema nalinga umwene ayege nhesya, kangi kubutali ukufuma ku myabo, pōpe umwene amenye ukuti umwene yo mwanundumiana gwa mwalafyale, kangi umwene—umwene ikwīyēga mwene bo yu mwanundumiana gwa mwalafyale.”

⁶³ Une ndinkwinogona, “Loli, ukuti, linga u m’Negro ikwisa ukufuma ku Afrika, kangi āmenye ukuti ugwīse āli nnyāmba gwa luko kangi mwalafyāle pamwanya pa luko, kyo kiliku iki ikylene kikulōngigwa ukumbombela ku Nkristi uyu apapigwe kangi, unnyambala pamo unkikulu, uyu Tata gwitu yo Mwalafyale gwa Kumwanya mu Lwimiko!” Uswe tukufimbilisigwa ukwītēndēka twībēne ukuya banyambala na bakikulu ba Kikristi. Uswe tukufimbilisigwa ukubōmbēla bo ikylene, ukufwala ngati ikyēne, ukuyoba bo ikylene, ukwitugala bo ikylene. Palema nalinga uswe tuli bahesya, loli uswe tuli bāna ba Mwalafyale. Amen.

⁶⁴ Akayilo kītu, ubuhuni bwītu mmasiku aga uswe tukwītugālamō lilino! Israeli āgwīle nkati mu nkolofwa gulagula kangi yōpe āli nhuni. Abēne bālibwībwe indagilo sya Kyala, “Ugwe ulingisa kulogwa ubulogwe, kangi ugwe ulingisa kunyonywa u nkasi gwa mpalamani gwāko,” na fyosa bo ifyo. Abene bālibwībwe i ndagīlo sila. Abēne—abēne—abēne bakālundāga ikylene kangi mma. Kangi abene—abene bālundaga u—u ukuya bo i kisu kyosa, itolo bo i kipanga kifikile umwīsyūgu.

⁶⁵ Akabalilo kamo, Israeli, akabalilo kako abene bālyāndīle, bālōndīle ukuya nu mwalafyale pamwanya pa ikylene. Samuēli ābabūlīle abēne, u nsololi uyu ātumīgwe ku bēne, umwene alinkuti, “Lilino ngimba une mbabūlilēmo umwe kalikosa mu Ngamu ya Ntwa lōli iki kikwīsa ukuboneka?”

Abene balinkuti, “Umma, ugwe ukabōmbamo.”

⁶⁶ “Ngimba une mbasūmilēmo siku kuli fyākulya fyāngu ni hela, ihela syīnu, syōpe, kuli une ukwitūgāla pa syēne?”

⁶⁷ “Umma, ugwe ukabomba ikyo mma. Ugwe ukatubūlamō siku uswe nakimo, Samuēli, loli iki kīsīle ukuboneka. Kangi ugwe siku ukatusūmīle uswe panongwa ya hela syītu, panongwa ya būmi bwāko. Lōli, pōpe, uswe tukulōnda u mwalafyāle, mulimōsa.”

68 Kyala alinkuyoba kwa Samueli, “Baleka abène baye nagwe umwène. Abène bakakupika ugwe mma; abène bapikile Une.”

69 Israeli āfikile nkati mula nkifwāni kilakila lilino. Abène bakālondāga abasololi ba Kyala kangi mma. Abène bakābafūmbilwe abène. Kangi linga yumo abagile ukwisa, nukubatwalila abène i Lisyu, nukugela ukubatwāla abène ukugomokela ku Lisyu, abène bisakukāna Ilyène. Abène akabalilo kōsa bikubōmba ikyène, mu njila yila iya bubole.

70 Akabalilo kāko ikīsu ni kipānga kikwilunganisya kyène palikimo, polelo abène batikulōnda nakimo ikyamwambepo. Abene batikulonda ISI SYO IKUTI U NTWA. Abene bikulonda iki abene bikulonda. Abène bikulōnda i kīsu, nukuyoba abène yo Nkristi; nukwitugala nkīsu, nukuya nu bumi ni kīsu kyapasi, nukuya nu bumi bo kikisu kyapasi, kangi pōpe nukukyūnga ubwiyobelo bwābo ubwa kuya Nkristi; Umwe mumenye, i kindu kya ikyène kili, ikylene kyo kwīyibwa kwāmwāmbepo. Ikyo kyo katikati iki ikylene kili. Abène batikumanya ukuti abène bo ba ywani. Abène bībwībwe kila iki abène babagile ukubomba.

71 Linga yumo abagile ukwisa umwisyugu, bo lula, ikylene angali kikukanigwaga itolo lulalula. Abène bāli ni mbūngo imbībi ya ikyène, kangi momūmo babōmbile abène umwīsyūgu. Abène balinkutoligwa ukwibonesya bēne ni findu ifikindakipeligwa, kangīmma, panongwa yakuti abene bakakilonda ikyène. I Lisyu, i Nongwainunu, abène bakālondāga Ilyène. Imbuno ya butulwanongwa yābakolile abène, kangī abène bakiganile ikyo.

72 Ubutulwanongwa bo bunoge ku ndūmbula insitakupīnduka. Ubwène bukuboneka bununu ku līnogonèlo ilisitakupīnduka, lōli iyène yo njila ya bufwe. Kikayapo nakimo kisyele loli bufwe. “Umfwalo gwa butulwanongwa bo bufwe,” kangī ugwe kufimbilisigwa ukufunja imifwālo gila. Ugwe ubyēle ku mibelo, kangī lilino kufūnja ku kafulafūmbi.

73 Ifimanyilo fyāmwāmbepo kangī ukulūmbilila kwa ntumigwa unsūnguligwa ukufuma kwa Kyala, nasiku fyānyenyemwīsyē abène kangī mma. Abakikulu babagile ukuseka mulamula nkisyo kyabo, nu kuyoba, “Une ndikufimbilisigwa ukubuka ukupilika i findu bo ifyo.” Linga ikyo kikāndīsyā kāngī! Ngimba ikyène kyo fiki? Ukwīyibwa kwāmwāmbepo, katikati iki kyène kili. Abène bībwībwe ukuti Kyala ni Lisyu Lyāke fifwēne, kangī Umwene akabagila ukusanusya Ilyene.

74 Linga unsololi aafyukile pa buyo mmasiku gala nukupa ikimanyilo ikyamwambepo, a masyu gamwambepo, kangī ikimūmpa a masyu ga Kyala kunyuma kwa ikyène, abène bābagile itolo ukuseka ku Lyène nukūgila Ilyène.

75 Umwe mumenye ubuyobi bwaiyolo, “Abatoyofu bisakwēnda ni filato ifya njwego pāpo a Bāndūmi bikutīla ukunyātūka.”

Ikyo kyo iki ukwíyĭbwa kwamwambepo kukubōmba. Ikyēne kikutēndēka abāndu ukufika pa buyo mpaka kūko abēne batikuya nubwīpilike nabumo nkati mwa bēne. Abene batikulonda nakimo iki kyo kyamwambepo.

⁷⁶ Ega u lukomano lwamwambepo ulwanaloliloli, kūko u Mbepo Mwikemo ikubūmbulusya ababine nukuketelaminogono aga gali mundumbula, nukukibika ikyene nkati pakati pa fyōsa ifipānga, itolo ulusasanio ulukulumba pānja apa mu stediya mu iyi, kangī kēta iki kisakubōmbigwa. Mu maminiti manāndi, aligwēsa isakusumukāga mmwanya nukusōka pānja. Abene bakaya nakyo nakimo ikyakubombapo ni kyene. Abene batikulonda nakimo ikyakubomba ni kyene. Abene bisakupilika ku buyobelo bumo ubwamahala.

⁷⁷ Loli akabalilo kako ikyene kikwisa ku Maka ga Yeso Kristi, nu busyuke Bwake, kangī u Mbepo Mwikemo, abene bikulonda nakimo ikyakubomba ni Kyene, panongwa yakuti ikyene kikubatobesya abēne. Ikyēne kikubabīka abēne pa moto ni kīndu iki abēne bābagile ukumanya. Nakumo ukukomigwa, ena, kunoge ku kabalilo. Loli, ikyene, linga ugwe kwisa kwilambika ku kyene, ikyene—ikyene kikutwala iseke sya lupinduko. Popāpo uswe tukusyāgania, akabalilo kāko ukwíyĭbwa kwāmwāmbēpo uku kukamandania abāndu, polelo abēne bali—abēne bali nkayīlo akabībi. Lilino uswe tukwaga kilakila lilino. Lilino une ngulonda . . .

⁷⁸ Ugwe kufimbilisigwa ukulinganisigwa. Kumo, ugwe kufimbilisigwa ukubonesya. Ubumi bwako bukubonesya, ikilo iki, kuko ugwe gulīnganisigwe. Ugwe ulinganisigwe pamo mwa Kristi pamo pānja pa Kristi. Ugwe ukaya sinda gwa njila. Kukayako nakimo i kīndu ukuya nyāmbala kinwēlwansitabugāle. Kukayako nayimo injuni indītu inyēlu. Ugwe pamo upokigwe pamo ugwe ukapokigwa. Ugwe gwe mwikemo pamo ntulanongwa, yumoywene pamo uyungi, kangī akayilo kamwambepo kubwa Lisyu lya Kyala kakulīngānia ugwe katikati pāpo ugwe gwīmīle. Kutalusya!

⁷⁹ Lisyu lya Kyala, lisisimikisigwe, lyāsīsīmikisye ukuti u losyo lwa Mbepo Mwikemo lo itolo lufwene na mumo ulwene lwāyililēmo siku pa Lisiku lya Pentekosti pamo akabalilo kalikosa akangi. Kangī Yeso Kristi yo yuyo mmayolo, umwisyugu, na bwilanabwila. Kangī akayīlo kāko ukwīsila Ikyo kakulīngānia kali ugwe uli nu kwíyĭbwa kwāmwāmbepo, pamo mma. Uko ko kutalusya. Kali linga ugwe uli ndiakoni, pamo pōpe linga ugwe uli ndumbilili, ikyēne kitikutēndēka . . . Ena, abēne bikukyēga ikyēne, bópe. Polelo uswe tukusyagania, ikyene kyo kyākwāmbula nu kutika ikindu kyosa. Lilino uswe tukuketesya.

⁸⁰ Lilino, ukuya mwaMerika yumo. Ukuya mwaMerika, une ngufimbilisigwa ukulinganisigwa ni kīsu kyāngu. Lilino pilikisya kifuki. Ukuya mwaMerika yumo, akabalilo kāko une

mbapigwege kuno nkisu iki, une ndinkuya mwenekaya, kangi une ndinganisigwe ni kisu iki. Fyosa ikyène kili, une ndili. Fyosa ifi ikyene kifumile pakuya, une ndili. Kabuno une ndinganisigwe ukuya mw'Amerika, polelo une ngufimbilisigwa ukwega fyosa ifya soni syake, syosa isya lwimiko lwake. Kilikyosa ikyene kili, une ndi, panongwa yakuti une ndinganisigwe ni kyene. Amen. Une ngulōnda umwe ukukupilikisya ikyène. Une ndinganisigwe ukuya mbāpo ya America, polelo fyōsa ikyène kyāli, une ndi. Fyōsa ikyène kili, une ndili. Une mbagile ukuya kiyabo kya ikyène. Une ndinakyo...linga une ndi mwenekaya gwa Amerika, une ndi kiyabo kya Amerika. Kangi fyosa ifi ikyène kili, une ndi.

⁸¹ Une ndīngībwāga ngamo siku iki. Linga une ngulōnda ukusyāla mwenekaya gwabwanaloli gwa kiMerika, une mbagile ukukumbukila ukuti une ne iki ikisu kyāngu kili, kabuno une ndinganisigwe ni kisu kyangu. Ukummwībwa umwēne, pamo—pamo... Ukundwīla umwēne, pamo ukumfwīla umwēne, pamo ukwīmīla kuli fyōsa umwēne ikwīmīla, une ngufimbilisigwa ukwīmīla ikyène. Iki ikisu kyāngu kili, une ndili. Iki ikyène kikwīmīla, une ngwīmīla ikyène. Ukuya mMerika unsūbiligwa, une nisakwītēdekēsya ukufwīla ikyène, ukulwīla ikyène, ukwīmīla ikyène, ukubōmba kalikōsa aka kaliko. Une ndi kiyabo kya ikyene. Ugwe ukabagīla ukusalapo pa kyene kisita kunsala pa une. Akabalilo kako ugwe kuyoba ikindukimo ukulwana ni kyene, ugwe kuyoba ikyene ukulwana na une, kabuno une ne mwaMerika. Ukuyoba ikyene ukulwana na ugwe, ukuya mwaMerika, kangi iki abene bikuyoba ukulwana ni kisu iki, abene bikuyoba ukulwana na ugwe, kabuno ugwe uli kiyabo kya ikyene. Komma ugwe ukwibwamo siku ikyene; akabalilo kāko ugwe kubomba, polelo ugwe uli nako ukwīyībwa, naloli ukufwana.

⁸² Kangi, kumbukilaga, ugwe ukaya mbāpo ya kiMerika akabalilo kako ugwe ukabagīla ukuya kiyabo kya ikyene. Ugwe kufimbilisigwa ukuya, iki America ali, ugwe kufimbilisigwa ukuya nugwe. Une ngufimbilisigwa ukuya balilanisi ba umwene. Iki kyo kisu kyangu, une mbagile ukuya kiyabo kya umwene. Iki umwene ali, une ndi. Muketile, iki umwene āli, une ndi. Kali umwene āli fiki, une ngāli ndi iki umwene āli.

⁸³ Ukuya mwaMerika, une nālobwīke pa Lyalabwe lya Plymouth, nu mwene, na batāta abatasi. Une ndinkufimbilisigwa ukubōmba; une ndi kiyabo kya umwene. Une nālitogile nu Paul Revere, ukunsoka umwene isya fipalapala fyāke. Linga une ne mwenekaya gwa kiMerika, une nālobwīke pa Lyalabwe lya Plymouth. Une nālitogile nu Paul Revere, ukunsoka umwene isya bupalapala bwake. Ngimba umwe mumene iki une ngusanusya lilino?

⁸⁴ Une nālobwīke u Delaware gwa matalala, nu George Washington, na basikali bāke basitafilato. Une nāli kula,

namanga une ndinganisigwe ni kisu iki. Iki umwène äbõmbile pala kyäli kiyabo kya une, iki une ngubõmba lilino kyo kiyabo kya mwène. Une nãlinganisigwe nu Washington, ku Delaware.

⁸⁵ Une nãlimile na Stonewall Jackson, akabalilo kãko ubutolwe bwãli bunywãmu fiyo ukulwãna nu mwène, kangi abène bälãlusisye, “Ngimba ugwe ubagile bulebule ukwima bo kibumba kya mabwe, akabalilo kãko ubutolwe bukulwana na ugwe?” Akanini akãsoni akĩnitu akãfisige-fya-bluu kalinkubãya ulufũmbi ulu ni filato fyãke, umwene alinkuti, “Une ngwegamo siku ukunwa kwa misi mpaka une ngupalisya Kyala Mwenemaka panongwa ya agene.” Une ngufimbilisigwa ukwima ngati kibumba kya mabwe nu mwène. Une nãlimile pala na Stonewall Jackson. Ukuya m’Merika, une ndinganisigwe nu mwène nu bwĩmilo bwãke. Ukukilania aba Delaware! Ukulwa amabwĩte!

⁸⁶ Une nãyugènie i ndëmbëla. Une nãli na bène akabalilo kãko abène bãyugènie i ndëmbëla pa Guam. Ukufuma pakuti maelifu ga basikali ba kiMerika bãpèle u bũmi bwãbo, kangi akabalilo kãko akabugutila akanini kala kakubopa mmwanya pala nukusopa indembela yabo mmwãnya, une nãlinganisigwe ku kufyusya kula kwa ndëmbëla yila; aligwesa gwa uswe äli. Bõsa abenekaya ba America bãlinganisigwe ni ndëmbëla yila yĩtulike ukukilania Guam. Akabalilo kako une mbilike ukuti abene babikile indembela yila pa mwanya pala, amasosi gikusuluka mmasaya gangu. Yula aali une. Yula aali ugwe. Ikyo kyasanusyaga uswe twesa, akabalilo kako uswe twalinganisigwaga kula na ikyo.

⁸⁷ Fyosa umwene ali, une ndi. Lõsa u lwimiko lwake lo lwimiko lwangu. Syõsa i soni syãke syo soni syãngu. Linga umwène abõmbile ifindu fyãsoni, polelo une ngufimbilisigwa ukundulalila umwène...ukwima ulufuyulo lwãke. Linga umwene ikwambilila u lwimiko, une ngwambilila u lwimiko nu mwene, panongwa yakuti une ndinganisigwe nu mwene. Lilino, ukulinganisigwa, mwaMerika ikufimbilisigwa ukwima ku soni sya America syõsa, lõsa ulwimiko lwa America, fyosa ifi umwene aalimo siku. Fyosa ifi umwene ali, pamo iki umwene isakuyaga, ugwe ulinganisigwe ni kyene.

⁸⁸ Lilino, ukuya Nkristi gwabwanaloli, ugwe kufimbilisigwa ukuya yulayula. Uswe tutikulonda ukwibwa ikyo. Fyosa ifi Umwene aali, une ndinganisigwe nu Mwene. Une ndinganisigwe nu Mwene.

⁸⁹ Këtësya, kangi Umwene ali mwa une, kangi une mwa Umwene. Këtësya, polelo, u Nkristi aligwesa uyu yo Nkristi gwanaloliloli—Nkristi, äli nu Mwene, “Akabalilo kako indondwa sya kulubunju simbaga palikimo kangi abanabalumiana ba Kyala balãtaga panongwa ya busangaluke, bo kukãliko u lwãlo lwa kisu.” Uswe twãlinganisigwe mfibãnja fya busitakufwa na Kyala, ifyĩnja maelifu-elifu kalongo bo kikãli ikisu kibũmbigwemo siku. Une nãli kunyuma

kula nu Mwene. Linga une ndi nabo u Būmi bwa Syepwa, une nāli kula nu Mwene. Une nālinganisigwe nu Mwene, “Akabalilo kako indondwa sya kulubunju sīmbaga palikimo kangi abanabalumiana ba Kyala baywēgile panongwa ya busangaluke.”

⁹⁰ Une nāli nu Mwēne akabalilo kāko Umwēne ālinkōlile Abraham ku ngulilo ya—ya fyīnja malongo-ntāndatu-nakalongo-na-fihano mbukusi, kangi unkasi gwāke ukuya malongo-ntāndatu-na-fihano, nukumbula umwene abene bayaga pakuya nu mwāna. Une nāli nu mwene akabalilo kako umwene ālyegile ubwime bwake pa ISI SYO IKUTI U NTWA, “Une nguyaga pakuya nu mwāna yula.” Une nālimile nu mwene. U Nkristi aligwesa uyungi ālimile nu mwene. Une nāli nu mwēne akabalilo kāko ingelo syāke sikwīsa. Une nāli nu mwēne akabalilo kāko umwēne ābūkile pamwanya pa kyāmba, ukupa pamwanya Isāki. Une nāli nu mwene akabalilo kako ing’osinyambala yābonike.

⁹¹ Une nāli na Yosefu akabalilo kako umwene āpikīgwe na bakundwe bake, panongwa yakuti umwene āli gwamwambepo kango abāngi ba abene bāli bamumbili. Une naali nagwe akabalilo kako umwene aamenye ulufuyulo umwene alinkufimbilisigwa ukwima na bakundwe bake bene. Iki umwene aali, une ndi. Iki une ndi, umwene aali. “Kabuno uswe twesa tuli yumo mwa Kristi Yeso.” Une nāli na Yōsēfu mu mbako yāke, ipūmba. Une nāli nagwe umwene akabalilo kako umwene ikubuka ku kiboko ikililo ikya Farao. Ugwe gwafimbilisigwaga ukulinganisigwa nu mwene.

⁹² Une nāli na Yākòbo ikilo kila akabalilo kāko umwēne ābīgēne ikilo kyōsa nu Gwāndūmi. Une nābīgēne, nīmwēne. Une mmenye iki umwēne ākīndilèmo nakyo. Popāpo une nābīgēne na Yākòbo akabalilo kalakala umwēne ābōmbile, kabuno une ne nkūdwe gwāke.

⁹³ Une naali na Mose akabalilo kako umwene aasulukege ku Igupti. Une naali na Mose pa lusingi ulupye. Linga ugwe uli Nkristi, ugwe ulinganisigwe na bandu ba Bangeli bala. Komma ukwiibwa ikylene! Une nāli na Mōse akabalilo kāko abāndu bosa bāsyumbutukile ukulwana nu mwēne. Une nāli na Mōse akabalilo kāko umwēne ālobwike i Nyanja Ingeseфу. Akabalilo kako umwene aafyusisye ikiboko kyake nu kukindilila, kangi Inyanja Ingeseфу yilinkwiguka, Une nālinganisigwe mwa Kristi palapala pala, kangi une nāli na Mōse pa sala yila.

⁹⁴ Kilikyōsa iki a Bakristi bafumile pakuya, kilikyōsa abītiki bafumile pakuya, umwitiki aligwesa lilino ikulinganisigwa nu mundu yulayula. Kilikyosa iki ikylene kili, ugwe kufimbilisigwa ukulinganisigwa. Koma ukwībwa ikyo. Akabalilo kāko ugwe kubōmba, ugwe uli nu kwīyībwa kwāmwāmbepo; ugwe gwībwiwbe uyu ugwe guli.

95 Lilino ndinganisigwe nu mwene, na Mōse, akabalilo kako umwēne ālobwike i nyanja.

96 Une nāli na Eliya mmasiku ga Ahabu, akabalilo kako abēne bafimbilisigwaga ukutendeka ulusalo uyu abene āngali bikubōmbela, Kyala pamo Balaamu. Uswe twali nagwe pa Kyamba Karmeli, akabalilo kako umwene abagisenie ukutendeka ulusalo ulu, kabuno uswe twe tulinganisigwe mu Mbili gwa Kyala yulayula uyu umwene ālinganisigwemo. Polelo linga uswe tukulinganisigwa mu Mbili gula, polelo uswe tukufimbilisigwa ukukumbukila uswe twaaliko kula nu mwene. Uko ko kotalusya.

97 Lilino, une nāli na Davidi, akabalilo kāko umwēne āpíkigwe na bakundwe bāke bēne. Une nāli na Davidi; ugwe gwāli, nūgwe, linga ugwe uli Nkristi. Ugwe kufimbilisigwa ukulinganisigwa mu bupíkigwe bwake.

98 Une nāli na bāna ba kiHiburi, mu ng’anjo ya moto, akabalilo kako u—u moto gukābagile ukōkya abene panongwa ya Kuyapo kwa Nnyambala gwābuna.

99 Une nāli na Danieli, mu mbako ya ngalamu. Une nālinganisigwe nkati mula, akabalilo kako u Gwandumi gwa Ntwa alindingenie umwene nkati mula.

100 Une nāli fiyofiyō naloliloli nu Mwene ku Kalvari. Une ngufimbilisigwa ukulinganisigwa nu Mwene pa Kalvari. Une ngufimbilisigwa ukuya pala ku buyo bumo, ukuti, kūko komma kāngi nāli une ndinganisigwe nu Mwēne ku Kalvari, une nāfwile nu Mwēne ku Kalvari. U Nkristi aligwesa ikufimbilisigwa ukufwa nu Mwene ku Kalvari. Linga ugwe utikufwa nu Mwene pa Kalvari, ugwe ukabagila ukuya nakimo kya Bāke. Une nāli kula akabalilo kako Umwene āfwile. Une ndinkufwa nu Mwene. Kangi polelo une nāli nu Mwene akabalilo kako Umwene āsyusigwe ku bafwe. Une ngwisa pa lubunju lwa Pāsa nu Mwēne, mu busyūke. Kilikyosa iki Umwene ābombile, une nāli palapala pala nu Mwene; umwitiki aligwesa āli lululula.

101 Kangi lilino une nītūgēsye nu Mwene Mmabuyo Gammwanya mwa Kristi Yeso, na maka gōsa ga gehena gapōnjoligwe, ukwisila mwa Umwēne. U Nkristi u mwitiki aligwesa ālitūgēsye mu njila yilayila, panongwa yakuti ugwe ubagile ukulīnganisigwa.

102 Lilino une ngwiyāga nimwene, mmasiku ga bumalikisyo aga, na bingi ba Bakristi aba bikwitika, ngulinganisigwa nu butumigwe Bwake. “Umwene yo yuyo mmayolo, umusyugu, na bwilanabwila.” Une ngwiyāga nimwene, mu lisiku ili, ngwilingania mu butumigwe Bwake. Ngimba ugwe kwiyāga gwīmwēne injila yila, kwitika ikyēne, ukwēnda ni kyēne? Ketesya, imbombo isi Umwene aabombile, Umwene aayobile umwitiki isakubombaga ikindu kilakila. “Imbombo isi Une ngubomba mwisakubombaga umwe numwe.” Polelo

ugwe ubagile ukulinganisigwa nu Mwene? Polelo akabalilo kako ulufuyulo lukwisa pa Lisyu, ngimba ugwe ubagile ukwima ulufuyulo bo mumo Umwene abombile, muketile, ukulinganisigwa nu Mwene? Une nalinganisigwe nu Mwene.

¹⁰³ Une nāli nu Mwene ku Lisiku lya Pentekosti. Une nāli na bafundigwa pamwanya pala, nalinganisigwe nu losyo lwa Mbepo Mwikemo.

¹⁰⁴ Une nguswiga linga i kipanga kikaya nu kwiyibwa bwingi fiyo lilino mpaka abene batikubomba, bamo mwa bene, batikwitika nukwitika kiliko ikindu bo Mbepo Mwikemo. Kēta kūko i kipanga kifikileko? Imbungo imbibi fiyo iya kwiyibwa! Muketile, abene bibwibwe ukuti yula āli Yeso Kristi kunyuma kula. Abene bibwibwe iki Yeso Kristi āli. Abene bibwibwe. Abene binogona Umwene āli itolo u—u mpela-gwa-ndagilo, pamo u nsololi, pamo u—u nnyambala unnunu. Abene balinkwibwa ukuti Umwene āli Kyala. Abene bālibwibwe ukuti Umwene yo yulayula mmayolo, umwisyugu, kangī bwilanabwila. Kangī i kipanga kili ni mbūngo imbibi ya kwiyibwa kwāmwāmbepo. Abene bibwibwe ifindu fyōsa ifi. Abene batikukipilikisya Ikyēne kangī mma.

¹⁰⁵ Uswe tukufimbilisigwa ukuya na bafundigwa ku Pentekosti, ukulinganisigwa na bene. Une nalinganisigwe nu bulumbilili bwa Peteri pa Lisiku lya Pentekosti, mu Imbombo untu gwa 2. Une nāpilike iki umwene āyobīle. Une ngwitika iki umwene āyobīle. Une nāpilikile iki umwene āyobīle. Lilino une ndinganisigwe mu kindu kilakila.

¹⁰⁶ Komma ukwāmbūla ukwiyibwa kwāmwāmbepo. Panongwa yakuti, ugwe kwisa, ugwe kwisakwilinganiaga gwimwene ni kindukimo ikingi. Ima palapala ni Lisyu lila!

¹⁰⁷ Uswe twāli ni Kipanga akabalilo kāko ikyēne kyatumigwe na Yeso Kristi, mu Imbombo, untu gwa 16. “Buka umwe nkisu kyosa, kangī lumbilila i Nongwainunu ku kipeligwa kilikyosa.” Une ngulonda ukulinganisigwa kula, “Ikisu kyosa, ku kipeligwa kilikyosa.” “Ifimanyilo ifi fisakukongaga abene aba bikwitika,” babagile ukulinganisigwa mu ikyo.

¹⁰⁸ Mulimōsa, lilino, ngimba ugwe ulinganisigwe na kila, pamo ngimba ugwe ulinako kumo kwiyibwa kwāmwāmbepo, ukuti ugwe kusyagania ugwe utikwitika ifimanyilo fila fikukonga abitiki? Muketile, linga ugwe utikwitika ikyene, polelo ugwe uli nu kwiyibwa kwāmwāmbepo, muketile, ugwe gwibwibwe ukuti Kyala āfingile kila. Umwene alinkuti, “Ifimanyilo ifi fisakukongaga abene aba bikwitika.” Komma ukwibwa ikyēne. Ugwe ukabagila ukwibwa ikyēne nukuya Nkristi. Ugwe kufimbilisigwa ukulinganisigwa ni kyēne.

¹⁰⁹ Ugwe kufimbilisigwa ukulinganisigwa na Mwikemo Yohani untu gwa 14, ilinandi lya 12. “Umwene uyu ikwitika na Une, imbombo isi Une ngubomba isakubombaga yope.” Komma

ukwībwa ikyēne. Linga ugwe kwībwa, polelo ugwe uli nu kwīyībwa kwāmwāmbèpo. Ugwe gwībwibwe ywāni ugwe guli. Ugwe gwībwibwe iki ubukēti bukusanusya.

¹¹⁰ Bule isya, Umwene aatile, “Linga ugwe kwitugasya mwa Une, kangi i Lisyu Lyangu mwa ugwe, ugwe ubagile ukusuma aka ugwe gwiganile kangi ikylene kisakubombeligwaga kwa ugwe”? Ngimba umwe mulinganisigwe kula, ukwitika ukuti ikyo kyo Bwanaloli? Mariko 11, akabalilo kâko Umwene ayobege, “Linga ugwe kuyobaga ku kyamba iki, ‘samisigwaga,’ kangi komma ukwilamwa mu ndumbula yako, loli kwitika ukuti iki ugwe uyobile kisa kubonekaga, ugwe ubagile ukuya nakyo iki ugwe uyobile.” Ngimba ugwe ubagile ukulinganisigwa pala, ukwitika ukuti kila kyo Bwānalòli? Linga ikyēne kikabōmba, polelo ugwe kwāmbūla ukwīyībwa kwāmwāmbèpo.

¹¹¹ Kangi—kangi ugwe kwibwa, ugwe kutāga ubufwānie Bwakikristi. Ugwe ukabagila ukukīndanisya kũko ugwe uliko. Ugwe kuyoba, “Une ndi gwa Methodisti. Une ndi gwa Baptisti. Ikyo kyo iki une mmenye ukufwana ni kyene. Une ndi gwa Pentekosti. Une ndi *iki, kila*, pamo *ikingi*.” Kētésya mōsa! Ikyo kibagile ukusanusya ukuti ikimanyilo kya mbũngo kikumāngisya pa ugwe, ukuti ugwe uli nu kwīyībwa kwāmwāmbèpo.

¹¹² Ugwe kuyoba, “Mulimōsa, Nkundwe Branham, une—une ngwitika *iki*, kangi une—une ndikubōmba kifuki...” Lilino gulila panandi itolo. Linga Kyalala afingile ukubomba ifindu ifi, kangi ayobile ukuti ifyēne fikuya ngako mmasiku ga bumalikisyo, kangi ikimanyisyo kyako kisakukupīnga ugwe ukufuma ku kyene, ikyo kyo kimanyilo kinunu une mbagile ukukēta ikimanyilo kya mbũngo pa ugwe. Ikyēne kyo kwīyībwa kwāmwāmbèpo. Ugwe gwībwibwe ukwīlingānia gwīmwene ni Lisyu.

¹¹³ Ugwe kuyoba, “Une ndikwītika ukuti ababine bikubūmbulusigwa.” Ugwe ulinako ukwīyībwa kwāmwāmbèpo.

¹¹⁴ Ugwe kuyoba, “Une ndikwitika mu losyo lwa Mbepo Mwikemo.” Kwīyībwa kwāmwāmbèpo!

¹¹⁵ Ugwe kuyoba, “Une—une ndikwitika ukuti Kyalala āfingile ukubomba ifindu ifi mmasiku gabumalikisyo.” Polelo ugwe upilikile ku kimanyisyo, pamo ikimanyisyo kimo, mbuyo bwa i Bāngéli. Ugwe uli nu kwīyībwa kwāmwāmbèpo. Ugwe ukamanya kuko ugwe uliko akabalilo kala. Ugwe kwilata, “u Nkristi,” nu kukana i Lisyu. Kikukutwāla ugwe ukugomokela ku kwīyībwa kwāmwāmbèpo kangi, muketile, kamanya kũko ugwe gwīmīle. Ugwe ulinako ukwīyībwa kwāmwāmbèpo. Ugwe ukabagila ukwilingania gwimwene na Masimbo.

¹¹⁶ Ugwe kufimbilisigwa ukuya na bafūndigwa. Ugwe kufimbilisigwa ukuya ni Lisimbo lyōsa, ni Kipanga akabalilo kâko ikyēne kikutumigwa. Lōli, lilino, akabalilo kâko i Kipānga kyātumigwe, “Bukaga umwe nkisu kyosa nukufumusya i

Nongwainunu; ifika ifi fisakukongaga abene aba bikwitika,” bula bwali butume bwake. Lilino abène bali...Bula bwali butume.

¹¹⁷ Lōli abène bayāgile imbūngo imbibi ya kwīyībwa kwāmwāmbèpo, itolo bo yu Eva āfikile pa...pa mwene, ukusyungutila ukukīnda mu ngunda, i lisiku limo. Lilino umwene ali bo yu Israeli, ikukubilwa ukufuma ku mbungo iyi yilayila, u lwāmbulo ukufuma ku fyākulya fya seminale ulu lwīsakukupa ugwe ukwīyībwa kwāmwāmbèpo. Ege ifyākulya fya seminale, kangī ugwe kwīsakwāmbula ulwāmbulo, kangī polelo, ikīndu kyākwānda ugwe umēnye, ugwe kwīsakwāmbula ukwīyībwa ukubibi nalōli. Ugwe utikwitika kalikosa ili Bangeli likuyoba.

¹¹⁸ Iyo yo nongwa iyi yili ni kipanga umwisyugu. Iyo yo nongwa uswe tukabagila ukuya nu luyigo umwisyugu. Ikyo kyo iki kyo lutamio na bandu umwisyugu. Abène balūsīgwe fiyo pamwanya pa makalasila ga filifyōsa, kangī ikimayisyo kililyōsa iki kyābagile ukwipānja mōsa, mpaka abène bakamanya iki kyo kitalusye kangī kisobi. Katikati. Umwene akabagila ukukumbukila u Ntwa. Umwene akabagila ukukumbukila Ilisyu Lyake. Umwene akabagila ukukumbukila ulufingo.

¹¹⁹ Ikyo kyaali itolo iki kyatamisye na Israeli, akabalilo kako Yeso aalisilepo pa buyo. Abene balinkutoligwa ukukumbukila, ukuti, “Umfunde isakuyaga ni kifuba.” Abene balinkutoligwa ukukumbukila ukuti Mose aayobile, “U Ntwa Kyala gwinu isakufusyaga u Nsololi afwanikisigwe bo Une.” Abène bali nu kwīyībwa kwāmwāmbèpo.

¹²⁰ Ikyo kyo katikati iki ikipanga kili nakyō umwisyugu. Umwene alinkuti, “Ukwene kukwisaga ukuboneka mmasiku ga bumalikisyo,” ukuti ifindu ifi fisakubonekaga pa buyo, ifi uswe tukukéta fikuboneka pa buyo, kangī ikipānga kikwitūgāsya ngati bafwe ngati sala ya kalongo-na-ibili. Ngimba ikyēne kyo fiki? Kwīyībwa kwāmwāmbèpo. Uswe tukwikolela twībene Pentekosti, kangī tukabagila ukulīngania, kangī tukubagila ukwibonesya twibene mu Lisyu akabalilo kako Ilyene lilumbiligwe mmaka ga busyuke bwa Kristi; kangī Umwene apa pakati pa uswe, ikubomba ikyene, kangī ukubomba katikati iki Umwene aayobile Ikyene kikubombaga. Polelo, kētèsya, ikipāngānio kyītu kyakipānga-kipāgūke kitutwēle uswe mu kwīyībwa kwāmwāmbèpo. Uswe tukukubilwa. Uswe tutikumanya kuko uswe tuliko. Yumo ikwegā ifikalatasi fyāke ukufuma ku kipanga *iki* ukubuka ku kipanga *ikingi*, kangī i kipanga *iki*, kangī ikimanyisyo *iki* ni kimanyisyo *kila*. Muketile?

¹²¹ Iki uswe tukulondigwa, kangī, yo Amosi uyungi ukwisapo pa buyo, na ISI SYO IKUTI U NTWA. Ngimba uswe tubagile ukummwāmbilila umwēne? Kifuki mūmo abène bābōmbile. Abène bakālimmwāmbililēmo siku umwēne. Abène bakabagila ukummwāmbilila umwēne umwīsyugu. Umwene alinkutoligwa

ukwega untu gwake mbuyo, kifuki, ukulumbilila. Lilino, uko ko katikati kotalusya, panongwa yakuti ikipanga kikutamigwa nu kwīyībwa kwāmwāmbèpo.

¹²² Lilino, fiki? Kya afingile mmasiku ga bumalikisyo aga, “Akabalilo kako u Mwanundumiana gwa mundu isakusetuligwaga,” ukufwana na Luka, untu gwa 17, “pa kimanyilo iki kyayaga pa buyo ku Sodomu, kisakubonekaga pa buyo kangi.” Kangi a bāndu bikukēta ikyēne kikubōmbigwa, kangi bamo mwa bēne batikwītika nu kwītika ikyēne. Abene bikwinogona ikyene kyo kubalila-pabutali. Abene bikwinogona ikyene kyo mbepo ya mōhèsi. Ngimba ikyene kyo fiki? Abene bikukubilwa nu kwīyībwa kwāmwāmbèpo. Ikyo kyo katikati. Abene bakabagila ukupilikisya u Ntwa. “Yeso Kristi yo yuyo mmayolo, umwisyugu, na bwilanabwila.” Iki Umwene āli akabalilo kala, Umwene ali lilino.

¹²³ Loli, iki kibonike, itolo ukwīlingania twībene kangi ni Lisyu. Fiki? Umwene, umwene akamanya kali umwene ko kubugono pamo kali umwene yo kipanga. Umwene atikulonda ukukoleligwa kubugonelo, kangi umwene akabagila ukukoleligwa kipanga; ’nongwa yakuti, ukuya nkōleligwe i kipānga, kwābagile ukulīngania mwēne na Kristi. Ikyo kikumpa mwēne u kwīyībwa kwāmwāmbèpo. Kangi umwene atikulonda ukukoleligwa kubugonelo. Polelo ikyene kikaya kipanga kya kiPentekosti, ikipanga kya Methodisti, kipanga kya Baptisti; ikyene kyo kubugono bwa Pentekosti, kubugono bwa Methodisti, na kubugono kwa Baptisti, panongwa yakuti umwene akabagila ukulinganisigwa ni Lisyu. Kangi akabalilo kākō i Lisyu likutēdekigwa ukubonekela, abēne pōpe batikwītika Ilyēne. Iyēne yo mbūngo, kwīyībwa kwāmwāmbèpo. Bakabagila ukwilingania bene; abene batikusimanya kuko abene baliko. Uko ko kotalusya.

¹²⁴ Ikyēne kyo itolo katikati ngati ukupāpisānia ikindukimo. Mumo une kingikingi njobile, “Une bwila ninogonaga ukuti kimo mwa findu ifitoyofu ukukinda fyosa ifi une ngetilemo siku yo mbunda-falasi.” Muketile, umwēne yo mfuluganie. Muketile, unna āli falasi ingīkūlu, u gwīse āli mbūnda, kangi umwēne atikumanya nakūko umwēne aliko. Kangi ikindu kyakwanda umwe mumenye, ugwe—ugwe—ugwe—ugwe ubagile ukutogesya umwene nukuyāga imbunda, kangi polelo...pamo ukwega i mbunda-falasi, loli i mbunda yikubagila ukwitogesya yene ukugomokela kangi. Muketile, umwene atikubomba. Ugwe ukabagila ukummanyisya umwene nakimo. Umwēne yo nkafuntu. Ugwe utisakumbūla umwēne kalikōsa...Ugwe ubagile ukubīka sila imbulukutu inywāmu indali. Kangi umwene isakugūlilaga mpaka i lisiku ilitali-ukukīnda lila ilya bumi bwake, itolo bo umwene akāli ukufwa, ukukubāya ugwe. Ikyo kyo kyosa. Umwene akabalilo kosa ikugulila pa kindukimo ukutāgila ikyene pa ugwe, linga umwene abagile.

¹²⁵ Kangi ikyo kikubika une mu linogono ifya kilundiko kya bakoleligwe-lulo Bakristi abafuluganie. Abene bapapisenie i kipanga mpaka abene begile imbungo ya kwiyibwa kwamwambepo. Abene bakabagile ukupapa kangi.

¹²⁶ Abene bikuyoba isya kupapisania ikilombe. Ikilombe ikyakupapisania kyo nakimo. Ikyene kyo kindu kibibi ukukinda-fyosa ugwe ubikilemo siku nkanwa kako, kalikosa akapapisanie. Fyobene ugwe kufimbilisigwa ukwega utubyaligwa utunini utu utwanasale, kangi ifindu ififuluganie, nukukupitila ikyene nukukigangula ikyene nukukisubisya ikyene. Fiki? Panongwa yakuti ifyene fikabagila ukukyunga utumbani ukusokapo pa ikyene.

¹²⁷ Loli i yanaloli, imbapisigwe kanunu, ugwe utikufimbilisigwa ukubika ni mikota nagimo pa mwene. Umwene ali na Maka nkati mmyake, ukumilisa utumbani ukufuma ku mwene. Ikyo kyo iki kwega ukukaga utumbani twa busitakwitika ukusokapo pa gwanaloli nnyambala Mbepogwanalolili.

¹²⁸ Ega i mbunda-falasi yayiolo, kangi ugwe kubuka ukuyoba ku mwene, utigi, “Yoba, ndumiana, une ngulonda ugwe ukubomba *iki, kila*.”

¹²⁹ Umwene isakwitugasyaga pala, “Hawu! Hawu! Hawu!” Imbulukutu inyamu indali sila sikubuka mmwanya-na-pasi. Une ngtile i—i kilundiko kya Bakristi kifuki ngati lula, ukukoleligwa-lulo.

¹³⁰ Ugwe kuyoba, “Yeso Kristi yo yuyo mmayolo, na bwilanabwila. Ifika ifi fisakukongaga abene aba bikwitika.”

¹³¹ “Hawu? Une ngusubila amasiku ga fiswigisyo gakindile. Hawu? Hawu? Hawu?” Muketile, umwene akamanya iki umwene naloli ikwitika. Umwene akamanya nakimo. Umwene akamanya kuko umwene ikufumila; umwene akamanya kuko umwene ikubuka. Umwene ali ni kwiyibwa kwa falasi. Umwene akamanya kuko umwene ikufumilako, kangi umwene akabagila ukubuka pabutalipo.

¹³² Loli une nunganile u mpapisigwe-kanunu ugwanalolili. O, umwene yo mololo. Ugwe ubagile ukuyoba ku mwene. Umwene amenye uyu ugwise ali, uyu unna gwake ali, uyu u mwisukulu na mbuya ali. Umwene ali ni fikalatasi fyabupelesye ukunangisya kuko umwene afumileko.

¹³³ Kangi une nunganile u Nkristi umpelesye, uyu abagile ukubuka injila yosa ukugomokela ku Lisyu lya Kyala, ku lisiku lya Pentekosti, nukwilingania bene pala na bikemo, kuko a Maka ga Mbepo Mwikemo galinkwisa pa bene. Uyo yo Nkristi umpelesigwe. Umwene amenye apa umwene ikufumilapo. Umwene atikulinganisigwa na baMethodisti, baBaptisti, pamo nakimo ikingi. Umwene ikwilingania mu Lisyu lya Kyala. Umwene amenye katikati kuko umwene imilepo. I Lilopa

ikyabunyafyāle Iya Tāta gwāke likwēndelēla ukikīnda mwa umwēne; i Lilopa Iya Yeso Kristi. Umwene amenye iki Ilyene likubomba! Umwene ikwitika i Lisyu lililyosa. Kyala ikubōmba ukwisila mwa umwēne kangi ikusisimikisya ikyēne ni fimanyilo ifi Umwēne afindile ukukōnga. Umwēna akaya nako nakumo u kwīyībwa kwāmwāmbèpo. Umwēne yo gwānalōli mbāpo-mbelelesye. Une nkiganile ikyo.

¹³⁴ Lōli i kipānga umwīsyūgu kili ni mbūngo imbībi ya kwīyībwa kwāmwāmbèpo. Ikyēne kitikumanya kūko ikyēne kiliko. Ikyēne kībwībwe fyōsa fya Ilyēne, kībwībwe fyōsa ifīndu ifi fīfyo fīkupela ikyēne i Kipānga.

¹³⁵ Ngimba kyo fiki kyātutēndike uswe ukuya bakabi bo mūmo uswe tuyīlile? Ikyēne kili nu buyo bwa Laodikiya kangi, ukugomokela mbuyo bula ubwabukabi ngati Israeli āli. Akabalilo kāko ikyēne kyāli kilondo kangi bāfimbilisigwe ukusūbīla Kyala kuli kilikyosa ikyēne kyābagīle ukubōmba, kilikyōsa ikyēne kyālinakyo, ikyēne kyālinsubile Kyala; polelo Kyala āli ni kyēne, kangi ikyēne kyāli kyamwambepo, nukukīndilīla nkyēni. Lōli akabalilo kāko ikyēne kilinkuya kikābi, apa kyo iki kyābonike: u twāya twābo tuyēngīgwe mōsa, kangi abakīkūlu bābo balinkuya balogwe, abanyāmbāla bābo balinkwītikisya ikyēne, abalūmbilili bābo balinkusulusya pāsī ifibaga, kangi abēne balinkukemela abasololi. Kangi ulo lo luko Iwa kayīlo abēne balinkufikamo. Iki kyāpelile kila, kwāli kwībwa kūko isayo sila syāfumileko.

¹³⁶ Kangi umwe baMethodisti, kangi umwe baBaptisti, kangi umwe baPresibeteri! Umwe baMethodisti mubagīle ukunkūmbukila Yohani Wesley. Umwe baBaptisti! Kangi u Yohani Smith alinkukūta pamwanya pa bwītūgasyo bwa bandu mpaka unkasi gwake alinkufimbilisigwaga ukundongosya umwene ku mēsa, ifisige fyāke fīswīle fīkupililīgwe, panongwa ya kulīla nu kwīpūta ikilo kyōsa ubutali. Ngimba kyo fiki kitamisye?

¹³⁷ Yohani Wesley āyobile ukuti kimo fīndu ifikulumba ukukinda-fyosa. . . Une ngwītika ikyēne kyāli kimo mwa bātāta abapabwāndilo baMethodisti bāyobile, “U bukosyasoni bwa bānabalīndwāna ba kipānga kya Methodisti, bwāli bukwānda ukufika pakuya bwānkīsu fīyo, abēne bāfwālāga isāmbō pa lōbe lwābo.” Ngimba umwene abagīle ukuyoba fiki lilino, ni bundu bafwele?

¹³⁸ Ngimba kyo fiki kyābonike? Kwīyībwa kwāmwāmbèpo. Katikati iki ikyēne kili, mwībwībwe kūko umwe mufumileko. Umwe muli nafyo ifīndu fyōsa ifi panongwa ya bupi bwa Kyala, ubununu bwābōmbīle ikyēne kwa umwe.

¹³⁹ Ngimba umwe mukwinogona iki kyo kindu ikihesya? Ikyene kyo katikati nu Mbepo gwa Yeso Kristi, u busololi. Mu Busetuli, untu gwa 3, ikyēne kyāyobīle, “Panongwa yakuti

ugwe kuyoba, ‘Une ndinkabi, Une ndinakyo ikyakufumbwa ikya nakimo,’ nukumanya mma ukuti ugwe gwe ndondo, mfwamaso, ngunigwe, mpelakisa, gwāngelebuno, kangi utikumanya ikylene” Muketile, utikumanya ikylene! Ngimba kyo fiki ikyēne? Kwiyībwa kwāmwāmbèpo. Abēne bakakimanya ikyēne.

¹⁴⁰ Ifipanga fili ni—ni hela lilino. Kikayapo nakimo i kipānga, kifuki, nkīsu, ikyabupāgūko, lōli iki kyo kya maelifu-elifu ukubāsania amaelifu-elifu ga madola. Ukuyenga maelifu-elifu na maelifu-elifu ga madola mu miyumba ni findu, nukulumbilila u Kwiswa kwa Ntwa kuli kifuki. “‘Bakabi,’ kangi alinkuti, ‘Une ndinakyo ikyakufumbwa kuli nakimo.’” Abalūmbillili abamanyisigwe kanunu ukukīnda abēne bālinabomo siku, bamenye ubufundakyala bwingipo ukukīnda mūmo bāmenyēmo siku. Kangi abēne balinagyo imiyūmba iminywāmu ukukīnda, amabuyo amanunu amasaligwe amakīnde nkāya. Abēne balinabo ubwābūke bwa bufikile ku kalikōsa abēne bikulōnda ukubōmba. Kangi polelo ngimba abēne bābōmbile fiki? Balinkufika mu kwiyībwa kwāmwāmbèpo nukwībwa ukuti umwēne āli Kyala uyu ābōmbīle ikyo ku bēne, itolo bo yu Israeli.

¹⁴¹ Kangi i Bāngēli lyasolwile, Yeso Kristi aatumile ugwandumi Gwake kwa Yohani kangi alinkuti, ingulilo yabumalikisyo iyi iya kipānga yābagile ukuya nu kwiyībwa kwāmwāmbèpo uku. Abene baali “bagunigwe,” kumbukilaga. Abene bikwinogona abene bo banywamu. Abene bikwinogona abene balinakyo ikindukimo. Loli Umwēne alinkuti abēne bāli “bapelakisa, bagunigwe, balondo, bafwamaso, bāngelebuno, kangi bakakimanye ikylene.” Kangi yikayapo injila nayimo iyakubabūlila abēne.

¹⁴² Lilino, linga u nnyāmbāla āli panja apa pa lukīndi, anyasigwe, pamo unkīkūlu, ali ngelebuno, pa lukīndi, mfwamaso, ikyo kikuyaga mbubonekelo ubupelakisa ukuya mbubonekelo bula. Lōli polelo linga abēne bāli na linogono ilinunu, bāmēnye yūyo abēne bāli, ukuti abēne bāli mūndu, kangi abēne babagile ukufwāla imyēnda; mulimōsa, ugwe kubūka pānja pala; abēne bo—abēne bo bāndu, babagile ukulinganisigwa nu luko lwa būndu; kangi panja pala, “bagunigwe, bapelakisa, bafwamaso, kangi bāngelebuno.” Kangi umwe mukubuka ku mwene, yobaga, “Nkundwe, ugwe gulibwasi.”

¹⁴³ “Lilino, apa! Une ne Dokotala *Gwakuti-na-gwakuti!* Ugwe itolo pākisyaga imbombo yako yene. Une ngukubula ugwe, une ndi gwa *Kyakuti-na-kyakuti!* Ugwe ukaya ni mbombo nayimo, ugwe mwikemo mbunguluka, ukumbula une nakimo!” [Ubuyo busitakandu pa tepi—Nsimbi]

¹⁴⁴ Babula abēne, “Ikyēne kyo kisobi kwa mundu ukubomba iki, kangi ku bandu ukubomba ifindu ifi abēne bikubomba.”

145 Kangi abène bisakukuleka ugwe ukumanya ukuti undumbilili gwābo mpapate-minogono. Muketile? Ngimba ikyene kyo fiki? Ikyene kyo, abene bīwibwe i ndagilo sya Ntwa Yeso. Polelo ndeke Umwene asulukege nukubomba ifika ni fiswigo ifi Umwene aayobile Umwene ikubombaga, abene batikulonda ukwitika ikyene. Ikyène kyo kwīyibwa kwām wāmbèpo. Muketile, abène bīwibwe! Kangi abène bāli ngelebune, kangi bakakimanya ikyène, batikukyāgānia ikyène.

146 Abène bikwīnogōna, “Itolo panongwa yakuti une ndi gwa kipānga, ikyo kyo kyōsa kyākulōndīgwa.” O, nkundwe, ikyo kikusanusya nakimo ikyakukīndapo mma kwa Kyala ukukinda ukuya gwa Mason pamo kilikyosa ikingi, kubugono bulibosa. Ku kipanga, ikyo kitikusanusya nakimo kwa Kyala.

147 Umwe mukufimbilisigwa ukuya banabalumiana na banabalindwana ba Kyala. Ugwe kufimbilisigwa ukupapigwa mwa Kyala, kangi Kyala yo Lisyu. Akabalilo kako une njege kiyabo kya baba gwāngu, une nguya fyosa tata gwangu. Akabalilo kako ugwe kuyaga kiyabo kya Kyala, ugwe kuya Kyala, mbwisusye. Lisyu Lyake lyosa, ugwe kwitika fyosa ifya Ilyene.

Kwīyibwa kwām wāmbèpo!

148 Bule linga ugwe ukamenye ingamu yako yāli fiki? Kangi linga ugwe uli, ugwe kufumila ku kikolo ikinunu, iki une ngusubila ugwe gwābombile, linga ugwe kwisa ukufuma ku kāya akanunu ka bāndu, kangi bule linga ugwe kwibwa i ngamu ya kikolo, kangi ugwe kubuka panja apa, kwītugāla nkosyasoni? Abene bikuyoba, “Ngimba ingamu yako yikaya Jones,” pamo kilikyosa ikyene kyāli. “Ena, une ngamanya uyu une nāli.” Muketile? Umma ndaga, muketile, ikyo kyo kindu kinyali fiyo ukuya, ubwitugasye ububibi ubwakufikamo.

149 Ena, apo po itolo pāpo i kipanga kisile ukuya. Ikyene kibagīle ukuya bwīmīlilo bwa Yeso Kristi. Lōli ikyène kībībwe ikyo, panongwa yakuti ikyène kifikīlepo, bīngisyēmo nkati mu kyène, ifimanyisyo ni fipanga-fipāgūke, ukuti abène bītīke ikyo mbuyo bwa Lisyu. “Kangi abène bali ngelebune, bafwamwaso, bapelakisa, kangi batikumanya ikyène,” kangi yikayapo injila iyakubabūla abène.

150 Une lumu ndisakuyamo siku mu Birmingham kangi, lōli aka ko kabalilo kamokēne abène bikuyaga pakupilika ikyène. Muketile? Muketile? Kutalusya. Une ne itolo... Une ngaya ninongwa pa nakimo loli kukusopa Imbeyu. Kyala ikutalulila Iyène ku mfū kūko Iyène yibagīlile ukubūka.

151 Balinkwibwa, ena, abene balinkwibwa i Lisyu Iya lufingo. Abene balinkwibwa. Israeli aali mu luko lula ulwa lutamio akabalilo kāko Yeso ikwisa. Ikyène kyālibwībwe. Abène balinkukēta, o, abène bayobāga abène bālītīke ukuti aliko ikwīsa Mesiya. Lōli akabalilo kāko u Mesiya ikwīsa

nukwilĩngania Mwēne ukwisila mu Lisyu, abēne bāli ni nyĩho fiyo mpaka abēne bātēndĩke i Lisyu lya Kyala ukuya lisita maka.

¹⁵² Kangi Yeso aafingile, itolo bo kakāli akabalilo ka bumalíkisyo, “Mumo ukwene kwayilile mu Sodomu, momumo ukwene kukuyilaga.” Kangi ikyēne āngali kikuya a balĩnganisigwe, kangi abāndu bo bānyĩho fiyo mpaka abene bātēndĩke ulufingo lwa Kyala ukuya lusita maka, nu lwiho lwabo. Kwĩyĩbwa kwāmwāmbèpo! Kwĩyĩbwa kwāmwāmbèpo ko katikati iki ikyēne kili. Muketile, abēne bĩbwĩbwe ifindu ifi.

¹⁵³ “O, une ndi gwa *iki*. Une—une mbombile *iki*. Une mmogile mwa Mbepo. Une nābombile *iki*.” Ena, mwe, mwe, ikyo kikaya nakyo nakimo ikyakubombapo ni kyene, komma na panandi.

¹⁵⁴ Ugwe ubagile bulebule ukuya Nkristi nukukāna i Lisyu? Ugwe ukabagila ukubomba ikyene. Kyala yo Lisyu. Linga i Lisyu lili mwa ugwe, ugwe ni Lisyu fyo fifwēne. Fyōsa ifi i Lisyu lili, ugwe uli. Ameni. Linga une ngwītugasyámo mu ngulilo iyi, iki akayabo ka Lisyu lifingile ku ngulilo iyi, une ngufimbilisigwa ukuya kila. Linga une nguyaga Nkristi, une ngufimbilisigwa ukulinganisigwa na fyosa ifi i Bāngèli likulumbilila nu kwĩmila.

¹⁵⁵ Aleluya! Mukuyaga pakungólela une mbunguluka mwikemo, mulimosa, kangi une ngwipilika mwiputi naloliloli kanunu lilino. Ena, nkulumba.

¹⁵⁶ Une ngufimbilisigwa ukulinganisigwa na kilikyosa iki i Bangeli likwiyobela. Kangi Ilyēne likupa ikyēne ifyakwiyobela, kangi, linga une ngatíkigwa nu kwĩyĩbwa kwāmwāmbèpo uku ukwa lisiku-lyāmwĩsyūgu, une nguyaga kangi mbagile ukulinganisigwa ni Lyene. Linga une ngukana Ilyēne, polelo une ndinako ukwiyĩbwa kwāmwāmbèpo; ikindukimo kibonike, Une nĩtikisye ikipāngānio pamo ikimanyisyo, pamo i kipanga kimo pamo ikibugutila kya nnyambala. “Une ngabagila ukubomba ikyene,” akabalilo kako pōpe i Lisyu likwisa nukwilĩngania Lyene.

¹⁵⁷ Fyōbēne Yeso akālyāganigwe. “O,” abene bikuti, “ena, unnyambala uyu yo mwikemo, kangi umputi gwitu mwikemo, u mwikemo gwitu *uyu*.”

¹⁵⁸ Kangi Yeso alinkuti, “Umwe muli ba tāta gwĩnu, mōhèsi, kangi imbombo syake umwe mwĩsakubombaga.”

¹⁵⁹ Ngimba umwe mwāmēnye Kaini āpēle ilikēmo ilinunu itolo, lyōpe? Umwēne āli gwanalòli-ndumbula, āyēngile ikigemo, alinkufugāma pāsi nukwĩpūta, nu kupa i likēmo, nukwĩpūta kwa Kyala. Kangi linga, Kyala, ikyo kyo kyosa iki Kyala ikulonda, ugwe ukuya gwa kipanga nukuya ni kigemo, nukuhomba ifyākalóngo fyāko nukubūka ku kipānga, nukwitūgāla ubūmi ubununu; linga ikyo kyo kyosa iki Umwene ikulonda, Umwene āli nsitabugolofu ukuntāga Kaini, ’nongwa yakuti umwene ābōmbile ikindu kilakila. Ena, nkulumba. Ikyo kyo katikati.

160 Lóli *bwĩpúti* kokuti “ikyakwikinga,” kangi ugwe ukabagíla ukukupililigwa ni mbombo syáko inuunu syagwĩmwène. Kilipo ikindu kimokyene iki Kyala isakwitikisyaga, kangi ilyo lya Lilopa lya Yeso Kristi. Ikyo kyo kyakwikinga kyene. Panja pa Ikyo, linga ugwe kuyoba, “Kyunga ikipánganio,” u kwíyíbwa kwámwámbe! Ikyo kyo iki kyābonike.

161 Lilino kētésya, abēne bĩbwĩbwe i Lisyu lyābo. Abēne bĩbwĩbwe i Bāngéli. Abēne bĩbwĩbwe ulufingo. Abene bikugela ukwitugasya mu lundaliko lwa ifi Methodisti āli, iki Baptisti āli, iki umunduyumo uyungi āli. Apa lo lufingo lwa lisiku ili, kangi Kyala ikuyoba Ikyene ukwisila mu Lisyu Lyake, kangi ukusisimikisya ukuti Ilyene lili lūlo, kangi abēne pōpe batikwītika Ilyēne. Kwíyíbwa kwámwámbe! Uko ko katikati kotalusya. Lōsa, lōsa abākwíyíbwa, naloliloli batikwītika Ikyēne napanandi.

162 Unsikali gwa kiFrenchi. Une nābūlígwe akapango akanini; bo uswe tukāli ukwigala. Une ngāmēnye nukuti ukwēne kwĩlile bo ulo, kangi une ndinago amāni kalōngo aga tusĩmbe apa gasyēle; ngwēgāga ikyēne akabalilo kamo akāngi. Kētésya, unsikali gwa kiFrenchi. Abēne balinabo ikibugutula kya basikali ukufuma ukufuma ku bābwĩte, kangi abēne bāli na uku ukwíyíbwa. Ikyene kyo ukufuma ku lunyomosyo, pa bwite. Kangi abēne bāli nu lubātiko, kangi abēne—abēne bākōlile kula kangi balinkubaleka abāndu aba bāli na baganigwa aba bayōngile ukukōlēla nukukēta linga abēne bābagile ukubāgānia abalumiana aba. Nalumo ulusūbilo ku bēne, lumo yumoywēne pamo babili, ukufuma ku kyēne, bākōlile ikyēne. Kangi polelo abēne bālyēgile abasyāle ba abēne, abēne bāyāga pakubabika abēne ku bāfigili, kūko abēne bafĩmbilisigwāga ukwitūgāla ku busyāle bwa būmi bwābo.

163 Abēne babūkāga pamwanya pa lubafu lwa kām̄ba, ukukwāba i sitima; kangi abēne bālimile pa bwĩmilo, ukubaleka abalumiana basōke pānja kangi bagolole amalūndi gābo. Kangi abakyūngaji balinkusōka pānja pa kām̄ba, ukukētésya abēne, panongwa yakuti nu kwíyíbwa, fiki, abēne—abēne bafĩmbilisigwāga ukubakētésya abēne.

164 Popāpo abēne balinkunketesya umwinitu unkeke pala, umwēne alinkusōka pānja nukwānda ukukelengania ku lipīpa lya mīsi, alinkukēta mōsa ukusyūngutula mu kām̄ba. Umwēne alinkwigūsyā ikisyo kyāke, kangi umwe alinkufūnda. Kangi umwēne alinkukēta kāngi, kangi umwēne ālibwēne ilipīpa lya mīsi lila. Umwēne alinkukēta mōsa ukusyūngutula pa malūka, kangi umwēne alinkwānda ukwēnda. Mbuyo bwākuti unkyūngaji ukummwīmika umwēne, umwēne alinkukōngēsya umwēne.

165 Umwene alinkubuka pamwanya pa kām̄ba, pási akayila akanini, alinkusyūmbutikila ku kililo kangi alinkubūka pamwanya ukukilania akām̄ba akāngi akanini, nu kwīsa

ku katēmbē akanini aka matapwa. Umwene alinkuketesya. Ukusoka pānja pa mbenu, unnyambala unkangale ni ngili nkiboko kyake, ukusoka pānja nukusopa ingōngi syake ukusyungutila umwene. Alinkuti, “U mwanundumiana gwangu, une nāmenye ugwe kwisakugomokelāga. Abēne bālimbūlile une ugwe gwāfwīle, lōli une nāmenye ugwe kwisakugomokelāga.” Kangi undumiāna yula alinkwisa kwa yūmwēne. U kwīyībwa kwāke kulinkundeka umwēne. Umwēne ābagile ukwīlingānia yūyo umwēne āli. Umwēne āmēnye ukuti yula āli yo gwīse.

¹⁶⁶ O, nsikali gwa Kipingika, uyu anyomosisigwe nu kumanyisigwa ukwīngi fiyo, ifyakunyomosa fingi fiyo ifya kipānga-kipāgūke kangi ikipānganio, ni findu fya nkisu, nongwa ya fiki ugwe itolo utikusōkāpo pa maminiti manini nu kubūka kukukētēsya ukusyūngutīla i Bāngēli? Ubagile ukwēmbēla ukusyūngutīla, kangi ugwe ubagile ukwīyāga gwīmwēne ulinganisigwe apa mu Lisyu, ukuya mwitiki, limo mwa masiku aga. Ugwe lumo ukammanya Umwene. Ugwe ubagile ukwisa kwa gwimwene, bo yu mwānundumiana unsobi ābōmbile, kangi iyāga gwīmwēne. Ugwe ubagile ukwāga ukwīlingānia kwako mu Masyu ga Kyala.

¹⁶⁷ Yumo āyobīle, ilisiku limo, pakaya patali mma, alinkuti, “Loli, Nkundwe Branham, keta kwa uswe abandu ba kiPentekosti, iki ifipanga ifinunu uswe tulinafyo. Fiki, uswe, uswe tulinabo ababombi aba bamanyisigwe.”

¹⁶⁸ Pilikisya, akabalilo kako u nnyambala ikwega u nkasi, umwene atikusubila mu bumogi bwake. Umma. Umwēne ikusūbīla mu busūbiligwe bwa lufīngo lwāke, ilisyu lyāke. Umwēne atikusūbīla mu bumogi bwāke. Umwēne ikusūbīla mu busūbiligwa bwāke.

¹⁶⁹ Kangi iyo yo njila akabalilo kāko ugwe kufika kwa Kyala, ugwe utikusūbīla mu kipanga kimo ikinywamu ikimogi ugwe ubagile ukuyenga, loli mu lufingo ulu Yeso Kristi aafingile, ukuti, “Une ne yulayula mmayolo, umwisyugu, na bwilanabwila.” Ngimba umwe mukwitika ikyo?

Unko uswe twinamisye imitu gyitu itolo pakabalilo.

¹⁷⁰ Une nguswiga, ikilo iki, mu nyumba apa kūko abandu bītugesye, kūko balipo abanyāmbāla na bakīkūlu aba bali Basyēpwa, bāndu aba batalwīle-kwa-Syēpwa, kangi ugwe umenye ukuti ilisiku limo pamo ilīngi ugwe kufimbilisigwa ukwagana na Kyala. Kangi une nguswīga linga ugwe gwāli akatūyi akanini ka kwīyībwa kula, kangi ugwe gwābagile. . . Ugwe ufumile pakwīlingānia fīndu fisobi, kangi ugwe ubagile—ugwe kulonda u luko ulwa kubēla ukusyungutila, ikilo iki, nukusyagania linga ugwe ukabagila ukulinganisigwa mwa Kristi Yeso? Ngimba ugwe ubagile ukufyusya ikiboko kyako, yoba, “Nyīputīla une, Nkundwe Branham, une—une ngulōnda ukulinganisigwa ukuya Nkristi ugwanaloliloli, u mwitiki

ugwanaloliloli.” Kyala akusaye ugwe. Kyala akusaye ugwe. Akusaye ugwe! O, ena, kubutali ukusyungutila. U Ntwa Kyala akusaye ugwe.

171 Umunduyumo mmwanya umo, ugwe kuyoba, “Nkundwe, une naloliloli ngwitika ikyo kyo Bwanaloli. Une ngwitika, ukuya Bakristi, uswe tukaya baKristi bo abene bālisibīle ukuya ifyinja ifi fikindilepo.”

172 Bule umwe bāndu ba kiPentekosti, akabalilo kākō abāmāma na bātāta bālisibīle ukwīma pa lukīndi panja apa, nukukuba i tamborini yayolo. Kangi u māma gwāko, mūmo umwēne āfimbilisigwāga ukuya...umwēne alinkufimbilisigwa ukuya nkatale, nukusukulika na ugwe bāna banini. Utubalilo tumo ugwe gwafimbilisigwaga ukubuka kisita myenda, na filifyosa ifingi, lōli tāta na māma bāli basūbiligwa ku Nōngwa, ukunkolela mmwanya Kristi.

173 Kēta iki umwe bandu ba kiPentekosti mwābombile. Ifyinja malongo mahano ifi fikindile, umwe mwāsōkile ukufuma ku kipanganio. Ikyo kyo iki kikipela umwe ukuya Pentekosti, umwe mwālipāgwīle mwibene ukufuma ku basitakwitika. “Kangi ukufwana ngulube ku ndipa, ni mbwa ku matesi,” umwe mubūkile kulakula ukugumokēla kangi mubōmbile filafila, mutēndike uluko lulalula lwa bufuluganio umwe musōkileko. Ngimba kyo fiki kitamisye? Ukwīyībwa kwām wāmbèpo kwābalanile pakati pa bāndu. Ugwe uli ni fimanyisyo fyāko kangi ifikalatasi fyakipanga-kipāgūke lilino, kangi ugwe uli itolo mmwanya na bosa ba abene, kulonda ukuya na bosa ba abene. Umwe mwālītikīsye abakīkūlu bīnu ukutumula inywīli syābo, ukupaka ilāngi. Umwe, umwe mubītikisya abēne ukubōmba fyōsa ifindu ifi, ukwītikisya fyōsa ifindu ifi mu i—mu fipānga. Ngimba kyo fiki ikyēne? Ukwīyībwa kwām wāmbèpo.

174 Polelo, ikindu kyakwanda umwe mumenye, akabalilo kako Kyala ikwanda ukuyātula pakati pa bandu, polelo ngimba fiki fikuboneka? Umwe mukabagila ukwāmbilila ikyēne. Muketile, umwe mubinile fiyo nu kwīyībwa kula, muketile, ikīndu kyēne umwe mupilikemo siku. Ngimba umwe mutikwinogona ukuti umwe mwabagile ukusokapo pa kimanyisyo kila itolo ku maminiti manandi nukupimba ili Bangeli, nukukēta iki u Nkristi abagilile ukuya ndīnganisigwe ngati? “Ifika ifi fisakukongaga abene aba bikwitika!”

175 Imbombo, Peteri āyobīle, “Pinduka, aligwesa gwa umwe, kangi mosigwege mu Ngamu ya Yeso Kristi kubufyule bwa mbibi, kangi umwe mwisa kwāmbililaga ikyabupi kya Mbepo Mwikemo; kabuno ulufingo luli kwa umwe, kangi abana binu, kangi bala aba bali kubutali, bope na babingī aba u Ntwa Kyala gwitu isakubakolelaga.” Linga abēne bikukubūla ugwe Ikyo kikaya bo ulu, polelo untimi gwāko ali ni mbūngo imbībi ya kwīyībwa kwām wāmbèpo. Umwene akabagila ikwīyāga mwene

ikwilingania ni Kipānga kila; komma ikipaguko; i Kipānga, u Mbili gwambutitu gwa Kristi.

¹⁷⁶ Lilino u Mbepo Mwikemo ali apa. Umwēne ali apa ukubomba itolo katikati iki Umwēne afingile ukubomba. Lilino bo umwe muli apa ni mitu gynu ginamisigwe, itolo umilisyaga ukwiputa. Unko u Mbepo Mwikemo ayobe, Mwene. Kangi kēta linga iki . . . Aligwesa amenye ikyo, u lufingo, iki ikylene kili ku lisiku ili. Lilino umwe mwe muli mu kufūmbwa, ikilo iki, umwe, mwe bingi ba umwe mufyusisye ifiboko fyinu. Bo umwe mukāli ukubomba ikyo . . .

¹⁷⁷ Une nguswiga, akabalilo kako uswe tuli apa kangi naloliloli tukwiputula ababine, une nguswiga linga ugwe ubagile ukusokako ku busitalwitiko lula, ikipanga-kipāgūke kila, ikimanyisyo kila iki kikukubūla ugwe ifindu ifi fikaya bo ulo, kila kimo iki kibagile ukukubula ugwe Ikyene kya mōhési. Akabalilo kako abēne bikubomba ikyo, “Abene batisakuhobokeligwamo siku, nkisu iki pamo ikisu iki kikwisa.” Bule linga Iki kyo Bwanaloli? Inogona itolo, bule linga Ikyene kili, polelo ugwe uli kugu? Muketile, ugwe utikufimbilisigwa ukuyoba ikylene panja; itika itolo ikylene mu ndumbula yako. Kangi balipo abandu apa aba bikwitika ikyo. Une nitūgēsye apa, kuli ikilo ibili isi syākīndāga, ngusukulika pāsi pa kindukimo, itolo, mwe, ukwikola nukuluma ululimi lwāngu, ukwikyūnga ukuti ndingakōlelāga ikyēne palapala pānja.

¹⁷⁸ Kangi kumbukilāga, mwinangu, ikyēne kyo pakati pa ugwe na Kyala. Bule linga ikyēne kisōbi, kangi ugwe kwīnogōna ikyo? Umwe mumenye iki kikuboneka, ugwe utisakuhobokeligwāmo siku panongwa ya kyene. Kwīyībwa kwām wāmbēpo, ugwe kwīsakubūka mulamula nkyēne mu bufwe Bwāsēpwa bwāko, ubusitalwītiko. “Umwēne yūyo atikwitika mma yo atalile atāgigwe!”

¹⁷⁹ Lilino iputilaga ububine bwinu, yoba, “Gwentwa Yeso, Ugwe ufingile. Une. . .”

Lumo bahesya bamo apa, aba bakayamo siku apa pabutasi.

¹⁸⁰ Yeso afingile, “Mumo ukwene kwayilile,” Une ngwegaga i Lisimbo limolyene, “mmasiku ga Loti,” akabalilo kako Kyala abonike pabwelu mu mbili gwa nyōfu; kangi abandu, Abraham, ikibugutila ikisūnguligwa, ikibugutila ikikōlelīgwe-panja. Kangi i ngamu ya Abram yāsanusigwe kwa Abraham, polelo umwene alibwene i Lisyu lilinkutendekigwa ukuya mbili, kangi Ilyēne linkumanya aminogono aga gāli mu ndumbula ya Sarah.

¹⁸¹ Kangi akabalilo kako u Luyungu Lwabunyafyale lwa Abraham lukwisa, ikyo kyo iki Umwene ābombile, kangi abene bālinkolīle Umwene “u mōhesi.”

¹⁸² Umwene alinkuti, “Lilino akabalilo kako u Mbepo Mwikemo ikwisa, isakubombaga ikindu kilakila.” Alinkuti, “Lilino lulipo

uluhobokelo akabalilo kako ugwe kungōlela Une kila, loli, akabalilo kako ugwe kuyoba ukulwana nu Mbepo Mwikemo, kukayapo nu luhobokelo.”

¹⁸³ Lilino Umwēne, mu Maka Gāke, alīsaga ukukīnda mu kilūdilo iki ikya bāndu, kulikosa kūko umwe muliko, kangī nu kumanyila-ngānila Kwake kwāmwāmbepo ukunangisya ukuti Umwene yo Lisyu. Popāpo ukuti linga balipo balibōsa apa bikukubilwa nu kwīyībwa, ukuti abēne batisa... bisakuyaga kisita bulēyelo, pankyeni pa kigemo iki kitēndekīgwe.

¹⁸⁴ Untwa Kyala alitūlaga. Lilino ni mitu gynu ginamisigwe, nulugindiko tukwīputa.

¹⁸⁵ Muketile, alipo unkikulu itugesye apa pankyeni pangu. Umwene alinago amaboko gake ku kisyō kyake. Umwēne ikukubilwa na kayīlo ka lugōngolomia. Kangī umwēne yo yōpe ali nu lutēnde. Umwene ali nu lutamio lwa munda. Kangī umwene itugesye apa pankyeni pa une lilino. Kangī umwēne abagīle ukumanya, umwēne akafuma ikīsū iki. Umwēne afumile ku kāya kakukōleligwa Macon. Ena. Ngimba ugwe kwitika Kyala abagile ukumbula une ukuti ugwe gwe ywani? Ugwe gwe Ndindwana Ayers. Linga isyō ndalusye, fyusya ikiboko kyako. Une ndinhesya kwa ugwe. Ikyo kyabwanaloli, bule ikyēne? Lilino ulutamio lwako lumalike. Yeso Kristi; ugwe upalamasisye umwenda Gwake. Umwene atendike ugwe uyege kanunu. Lilino itikaga itolo ikylene.

¹⁸⁶ Alipo unnyambala itugesye ku nyuma ya nyumba iyi. Umwene ikulondesya ulosyō lwa Mbepo Mwikemo. Umwene ikulonda ulosyō nu Mbepo. Umwene ikwima apa pankyeni pa une. Umwēne akaya gwakufumila kuno mma, yōpe. Umwēne yo ukufuma ku Carolina, Charlotte. Lepoe yo ngamu yāke. Itika ni ndumbula yako yosa, kangī Kyala isakwīsusyaga ugwe na Mbepo Mwikemo, nkundwe gwangu—gwangu, linga ugwe kwitikaga ikylene.

¹⁸⁷ Apa, ukukilania ku kililo kyāngu, apa alipo u—u nnyāmbála nu nkasi gwāke itūgésye palapala nkyēni myāngu apa. Abēne ba bakāngale babili, ku kililo kyāngu. U nkikūlu ikukubilwa na kayīlo ka māla amanywāmu. Undume gwāke ali nu lutamio lwa ndūmbula. Abēne bakaya bakufuma apa mma. Abēne ba kufuma ku Tennessee. Tata. na Nka. Thomas, linga umwe mukwitikaga ni ndumbula yīnu yosa, fyusya amaboko gīnu kangī umwe mubagile ukwitikisya ulubumbulusyō lwīnu. Yeso Kristi ikubapela umwe ukuya kanunu. Ikyo kyo katikati iki Umwēne āfingile ukubomba. Loli une ngababonamo siku abandu mbumi bwangu.

Kwīyībwa kwāmwāmbèpo!

¹⁸⁸ Yeso alinkuti, “Imbombo isi Une ngubomba mwisakubombaga umwe numwe. Nkabalilo kanini, kangī ikisu kitisakumbona Une kangī'mma; loli umwe mwisakumbona

Une, kabuno Une,” pulonauni ya ubwenenakyo, “nisakuyaga na umwe, mope nkati mwa umwe, kukubumalikiyo bwa kisu.” “Yeso Kristi yo yuyo mmayolo, umwisyugu, na bwilanabwila.”

¹⁸⁹ Lilino, ku banyambala na bakikulu muno, aba itolo balinakyo i kindukimo kisobile na ugwe, ukuti ugwe itolo ukabagila ukukêta mûmo... Ugwe, ugwe kulonda ukwitika, lôli ugwe itolo ukabagila ukwîngila mu kyêne, kangî ugwe kulonda ukuti gwiputililigwe, ugwe kulonda ukummwitika Umwene akabalilo kako ugwe uli mu Kuyapo Kwake, ngimba ugwe kwisaga nukwîma papapa apa kifuki na une, unko une nîputile nukubîka amaboko pa ugwe. Linga ugwe ubagile ukwisa papapa pamwanya apa lilino, umwe mwe mukukubilwa bo ulo, nu kwîyîbwa kwâm wâmbèpo, kangî mubagile ukulônda ukwîputiligwa, ukuti umwe mwâbagile ukuya bâbûke ukufuma ku kila. Linga ugwe ukaya yo—ukaya mwitiki, loli kulonda ukwiputililigwa, isaga pamwanya apa nukwîma. Kyala akusaye ugwe, nnyâmbâla nkeke. Umunduyumo uyungi ikwisa? Kyala akusaye ugwe, nkikulu. Isaga. Kyala akusaye ugwe, nkikulu ntubwa. Umunduyumo uyungi ikwisa? Isaga, ima papapa pamwanya apa, itolo lilino.

¹⁹⁰ Ukwîyîbwa kwâm wâmbèpo, une ndikulônda ukuya nâmbuligwe na ikyo. Kyala mwiko. Unko une—unko une mfwe u bufwe bwa—bwa kalikôsa, lôli nasiku ukundeka une ngufwa bula u bufwe ukuya nsitamwitiki.

¹⁹¹ Isaga, mwikisya Umwene lilino. Ngimba umwe mutikubomba ikylene? Isaga ukufuma apa, nukwisa ukusuluka ukufuma mu balakoni, binangu. Ukwene ko itolo mafyukilo panini pâsi apa, kangî ikylene kibagile ukusanusya ukukindana pakati pa bufwe nu Bumi, kwa ugwe.

¹⁹² Keta, une ngabagila ukumpela Kristi ukubomba nakimo. Kristi atikufimbilisigwa ukubomba kalikosa loli ikindu kimokyene: Umwene ikufimbilisigwa ukwîma ni Lisyu Lyake. Umwene ikufimbilisigwa ukubomba ikyo ukuti ayege Kristi, ayege Kyala. Umwene ikufimbilisigwa ukwîma ni Lisyu Lyake.

¹⁹³ Lilino kumbukilâga, linga ugwe ukasisimikisya ikyakubonekela kyâko, nongwa ya fiki utikwîsa ukusuluka lilino. Linga ugwe itolo uli gwa kipânga-kipâgûke, linga ugwe guli mwîsukulu gwa Kipentekosti, Kyala akaya nabo nabamo abîsukulu, Umwene ali na banabalumyana na banabalindwana, loli akaya na bîsukulu-balindwana kangî bîsukulu-balindwana. Muketile? Kyala akaya nabo abo. Umwene itolo ali na banabalumiana na banabalindwana, kangî ugwe umenye ukuti ugwe ukaya.

¹⁹⁴ Lumo ugwe uyobile mu ndimi, ugwe ubagile ukuti umogilemo, ugwe ubagile ukuti ubombile fyosa *ifi*. Ikyo kyo kinunu mosa. Une ngaya nakyo nakimo ikyâkulwana ni kyêne. Lôli pôpe linga ugwe ukâli uli nu kwîyîbwa kwâm wâmbèpo

kula, isaga pankyeni ukusuluka, kangi isa apa nu kwíma apa. Unko uswe twipute ukufwana ni kyene. Ngimba ugwe kuyoba fiki? Mbakasya ya kipanga, itolo u—itolu u mbakasya gwa kipanga ikyangamu, nongwa ya fiki ugwe utikwisa kuno nukukileka ikyene lululu lilino?

¹⁹⁵ Une ndikulōnda ukusókamo mu Birmingham kuno, nukumanya ukuti ilisiku limo, akabalilo káko u Bulōngi bukwiśa pala, kangi une ngufimbilisígwa ukwíma akabalilo kala pankyēni pa umwe. . . Kumbukilága, une nguyaga pakwágána na umwe kángi. Linga une ngāganamo siku na umwe apa pa iki, pamo une nguyaga pakwágána na umwe ku Bulongi kangi une ngufimbilisígwa ukwakwamula panongwa ya iki une njobile ikilo iki.

¹⁹⁶ Lilino pilikisya. Pinduka, binangu! Pinduka, sōka panja pa ikyēne. Sōka pánja pa pala. Isaga nkyēne lilino.

¹⁹⁷ Ikyo kibagile ukutēndēka aligwēsa unkíkūlu untumula-nywili nkísu iki, pamo ubuyo ubu, ukwísa pamwanya apa lilino. Uko ko katikati kotalusya. Ikyo, ukuti umwe mukaya nalyo ilipyana ilyakufwana ukuyoba naloliloli, “Une—une—une—une ngulonda, une ngulonda ukuleka inywili syāngu ukukula panja, Nkundwe Branham.” Ikyēne kibagile. . . “Une ndinalyo. . . Ena, une ngaya nalyo ilipyāna ukubōmba ikyēne.”

Fiki, ugwe kuyoba, “Ngimba ikyo kilinako kalikosa akakubomba ni kyene?”

¹⁹⁸ Apa pakaya patali mma, undumbilili ugwa naloliloli unkulumba alinkwisa kwa une, kangi alinkuti, “Une ngulonda ukubika amaboko pa ugwe, Nkundwe Branham.” Alinkuti, “Aligwesa ikukwēga ugwe ukuya nsololi.”

Une ndinkuti, “Une ngāyobilémo siku ukuti une ndi nsololi.”

¹⁹⁹ Umwēne alinkuti, “Lōli abāndu bikukwēga ugwe ikyo. Ugwe akabalilo kōsa kuswanyulania abakíkūlu bala, isya kufwāla ibundu,” kangi—kangi, o, unnyambala gwa kiPentekosti. Kangi alinkuti, “Ukufwana ni bundu, nukusenga inywili syabo, ni findu.” Alinkuti, “Iyo yikaya mbombo yako.”

Une ndinkuti, “Ngimba yo mbombo ya ywani iyene polelo?”

²⁰⁰ Kangi umwene alinkuti, “Abandu bala, fiki ugwe utikubamanyisya abene abakikulu mumo ukuya, ukuya ni fikūngilwa ifikulumba, nukubatūla abāndu, mbuyo bwa kugela uku. . .” Alinkuti, “Abēne bikukwēga ugwe. Iki ugwe kubabūla abēne, abēne babagile ukwitika ugwe.” Alinkuti, “Fiki ugwe utikubabūla abēne akāmbililo ka fikūngilwa ifikulumba nukubatūla abāndu, mbuyo bwa bwīla ukubakemela abēne?”

²⁰¹ Une ndinkuti, “Ngimba une mbagile bulebule ukubamanyisya abēne i aljebra akabalilo káko abēne batisa nukumanyila aba ABC bābo?” Muketile? Muketile?

202 Ugwe kufimbilisígwa ukwānda ukufuma pa pāsi, pinduka pamo pyūtígwa! Lilino ugwe ubagile ukwifwanikisya gwīmwéne, pinduka pamo pyūtígwa! Yeso Kristi yo mōsanamōsa ilinganisènie Mwēne apa, kilo ukufuma kilo. Kangi iki kyo kilo iki uswe twasanukilaga ukukilania ku bupoki ubu. Agēne go mafyūkilo manāndi pamwanya apa, kangi une ndinako akabalilo akīngi ukugūlila.

203 Kumbukilaga, Birmingham, ililopa lyīnu likaya pa une. Une ne nsitanōngwa. Kangi linga ugwe naloliloli uli nagwe Mbepo Mwikemo, ugwe uli nu lusako ukwisa lilino. Kangi linga ugwe kukubilwa nu luko lumo lwa bwākipānga ubu bukupelile ugwe ukuya nu kwīyībwa kwāmwbēpo, fiki ugwe utikwīsa? Yeso yo nkota. Ngimba ugwe utikwīsàga?

204 Lilino abandu bamo bakilekile ikibalakoni. Une nagūlilaga ukukéta kuko abene bāli, bikusōka panja pamo ukwisa ku kigemo. Aba pāsi apa, bikwisa nkyēni ukusyungutila. Uko ko kutalusya. Umwe mwe muli apa, isaga ima ukusyungutila pa kigemo, yoba, “Une mmālisise na iki.” Ena, abēne basulukaga pāsi, abakikulu babili. Ikyo kyo kinunu.

205 Isaga itolo nkyēni apa lilino. Itolo amafyūkilo manāndi ukufuma ku kyēne. Kangi amakato gala gabagile ukusanusya ubukīndàne.

206 Lilino, keta, une ngulonda ukukulalusya ugwe i kindukimo. Bule linga Umwene ikwisa ikilo iki? “O,” yoba, “Umwene atisakwisa mma.” Une ngamanya kali Umwene ali pamo mma. Iki kyo kimanyilo kyabumalikisyo. Kumbukilaga, ISI SYO IKUTI U NTWA! Ngimba umwe mupilikemo siku une nguyoba ikyo loli iki ikylene kyaali kyabwanaloli? Umwe mukukéta ikimanyilo kyinu ikyabumalikisyo. Ikyo kyo Kyammasimbo. Ugwe ukibwene ikimanyilo kyāko ikyabumalikisyo, Pentekosti. Komma ukufuluganika lilino na iki Umwene aafingile Israeli ukufuma pa Kunyakiligwa; ikyo kikaya umwe mma. Umwe mumalike, akabalilo kala. Muketile? Lilino lyo lisiku lyāko. Lilino kyo kimanyilo kyāko. Lilino ko kabalilo kāko. Komma ukukāna Ilyēne. Komma ukubomba ikyēne. Ugwe kinunupo gwisege. Ugwe kwitika une ukuya gwambombo gwa Kyala? Kumbukilaga.

207 Birmingham, une ngāganāmo siku na bāndu abanunupo. Umwe mwe bāndu banunu ukukīnda une mbagile ukulōnda ukwāgāna mbūmi bwāngu, lōli umwe mukufūmbwa uluyigo. Umwe mukufwa. Umwe mukwēga ukwīyībwa kwāmwbēpo. Umwe mukufwa. Komma ukubōmba ikyo. Yiga kila iki umwe muli nakyo. Twala ikylene mmwānya kangi, mbibimbibi, bo Yeso akāli ukwisa.

208 Umma ndaga, akabalilo kako abene bali...Umilisyaga ukwisa. Itolo baleka abene bakyungege ukwisa mpaka uswe twesa, ukuti u Ntwa ikukōlela, pamwanya apa. Isaga lilino.

209 Sosyāmo kula u kwíyĭbwa. U Ngānga unkulumba ali apa lilino ukubūmbulusya ikyo, sōsyapo ikyēne ukufuma kwa ugwe. Umwene asisimikisye ukuti Umwēne ali apa. Balinga bisakulinganiaga ikyo, ukwisila mu kufyusya ikiboko kyako, kuyoba, “Une naloliloli ngwitika ikyene; ukuti Umwene āyobile Umwene ikubombaga iki”? Muketile? Lilino Umwene ali apa. Muketile? Muketile? Ugwe itika.

210 Kangi balinga bamenye ukuti une ngubabula umwe u bwanaloli, ukuti umwe mukufwa kangi mukufūmbwa ulusasano? Muketile? Ikyene kyo bwanaloli.

211 Umwe muli bāndu banunu. Ugwe ukabagila ukwāgamo nabamo abanunupo. Sikayapo nasimo indumbula inunupo sikutika, ukukīnda kūsi kwa mashāti gaiyolo aga a Gakwitōngo pāsi apa. Uko ko kutalusya, abāndu bānalòli! Lōli, mwe bāndu, umwe kinunupo sumuka, nakalinga itolo! Mu sala iyi umwe mutikwinogona, ikyene kibagile ukuboneka. Ikyene kibagile ukusita kuboneka; une ngamanya.

212 Lōli, kumbukilaga, umwe mukwēga ikimanyilo kyīnu ikyābumalikisyo, popāpo bōpa bo umwe muli na kabalilo ukubōpa. Isaga lilino. Akabalilo kosa aka abene bikwisa, une ngumilisyaga ukugūlila, panongwa yakuti lumo. . . U mōyo gumogwēne go gukūla ifisu maeilifu kalongo. Kangi akabalilo kōsa abānda bikupilikisya. . .

213 Une ngulōnda ukukēta iki kikubalanila mukuya luyigo ulukulumba ulunywāmu ulu lubagile ukubīka ikipānga kilikyōsa ukusyūngutila kuno; linga umwe mubagile ukubongotolania mōsa ubukīndāne bwīnu nukusōsyāpo bōsa bula ubupafu, nu kwītikisya u Mbepo Mwīkēmo. Umwe mwīyobile ukuti umwe mukwitika Ikyene. Umwe mwāliyobile ukwītika Ikyēne, kangi, akabalilo kāko Ikyēne kikwīsa ukwīlingānia Kyēne, polelo umwe mwisakwīlūsānia ukufuma kwa yumo nu nnine. Nongwa ya fiki tutikulūngisānia indūmbūla syītu ni Lisyu lya Kyala nu kwītika u Bwānalòli? Ikyo kyo iki. Umwe mwisa itolo ukūmilisya ukufwa, kufwa, kangi umwe mukubuka itolo panja mu Laodikiya. Katikati iki Umwene āfingile, Ikyene kikuyaga mu njila yila. Ngimbo ugwe utikwisaga lilino? Lilino lyo lisiku. Lilino ko kabalilo ka kwitikisigwa. Kētēsya iki u Mbepo Mwīkēmo ikubombaga.

214 Lilino une ngulonda abalumbilili bosa apa, aba bīkyēlile mu abandu aba, isaga biputile nanine, bope. Isaga pamwanya apa, abalumbilili bosa aba bīkyēlile mbāndu aba. Isaga, itolo isaga papapa ukusyungutila, kangi ukwingila nkati mbandu, u ndūmbilili, pamo u mbōmbi gwa pīmwēne, u mbōmbi unnunu gwa pīmwēne, abakīkūlu aba babagile ukwīma na bakīkūlu aba lilino. Une nguyaga pakwītika, ni ndumbula yāngu yōsa, ukuti u Mbepo Mwīkēmo ikuyaga pa kwīsa pa buyo ubu papapa apa lilino kangi itolo ukwīlingānia Mwēne lōsa pakati pa bāndu aba.

215 Lilino unko une mbalagile abāndu aba apa, tāsi. Lilino, binangu, kilikyosa umwe mwisile apa, Umwēne amenye. Kangi une mbagile ukusisimikisya ikyēne kwa umwe, Ikyēne kisakwēgāga, yumo mwa yumo, ukukutwala ugwe pamwanya apa pa kigemo iki, kangi kutisakuyangapo ikindu kimokyene iki Umwene atisakutēndeka ukumanyigwa mma. Lilino ikyo kyo ukufuma pāpo une nāli ndumiana nnini. Ikyābupi kila kikaya mu lilālúsyō mma. Lōli ililālúsyō lyo, ngimba umwe mubagile ukwambilila ikyēne? Ngimba umwe mukwitika ikyene? Lilino Umwene ali apa. Ena, linga Umwene ali apa, polelo kilipo ikindu kimokyene itolo, Umwene ikwima ni Lisyu Lyake. Polelo itika itolo ukuti ugwe kwaambilila ikyene, nukwitikisya ikyene, nukufyusya mmwanya nukuyoba, “Ntwa Kyala, une ndi apa ukwitikisya ikyene,” kangi itolo syala pala mpaka ikyene kikuboneka.

216 Bo yu Buddy Robinson alinkuyoba akabalilo kamo, mu ngunda gwa filombe. Umwene alinkuti, “Ntwa, linga Ugwe utikumba une u Mbepo Mwikemo, akabalilo kākō Ugwe kugomokela Ugwe kwisakwāga ikilūdiko sya fifupa filāmbaléle papapa apa.” Umwēne āli katikati gwākugūlila. Kangi umwe mutisakwāmbililāga kalikōsa ukufuma kwa Kyala mpaka ugwe kufika pakufūmbwa ukufikapo.

217 Lilino, ngimba umwe mukētēsisyē ikyakubyāla kya mwīsyūgu, ngimba umwe mukētēsisyē umwīsyūgu iki uswe tukubōmba? Uswe, nālōli, uswe tulinagwe Kyāla gwakufikapo ukusyūngutula uswe mpaka kūko uswe tukwīsa pa mwanya pa kigemo, uswe tukuyoba, “Ena, lumō une kinunupo nīse pamwanya.” Lilino ubu bo bwīsibile bwa kīsu-kyōsa. “Ena, une kinunupo mbūke mmwanya kangi nīme.” Yoba, “Ena, ena, une ngamanya. Apa une ndipo, muketile.” Hum! Bo buyo buki ukuyamo! Gukayapo u mōto gukupyā. Bukayapo ubwīgūte. Akayapo nayumo u “būka mu Kyēne!” Kangi, ukuya ndumbilili, ikyo itolo kikungoga une ukukēta abandu ba Kyala mbubumbe bula. Uswe tubagisenie ukuya pa moto.

218 Loli, umwe muketile, kyo fiki ikyene? Ikyene kyo katikati iki une mbabulile umwe. Busetuli 3, “Umwe mulūngwile. Kangi,” Umwene alinkuti, “panongwa yakuti umwe mulūngwile, polelo une nguyaga pakubafunya umwe ukufuma nkanwa Mwangu.” Uko ko kutalusya? Ikyo kyo iki Umwene āyobile. Kangi, linga Umwene āyobile ikyo, ikyo kyo iki Umwene ikubombaga. Polelo unko uswe tulingayaga kilundilo kila.

219 Ugwe uli apa, mfūmbwe. Unko uswe tukyāge Ikyēne, pamo tufwe, papapa apa. Uko ko kutalusya. Unko uswe tukyāge Ikyēne, pamo tufwe.

220 Lilino, nkundwe gwangu umpala, kalumbu, linga une mbagile ukwisa pāsi nukutūla ugwe kubomba ikindukimo, une naloliloli ngusisimikisya ikyene. Lilino, ukwīsila ikikūngilwa, une mbagile ukukubula ugwe iki ugwe gwīsile apa. Une mbagile

ukukubula ugwe ifi fyo, ukwisila mwa Mbepo Mwikemo, mwa Mbepo gwa Kyalá, ukukubula ifi ugwe gwísile, iki ugwe ubombile, iki kikuyaga nkyeni, pamo ikindukimo bo ikyo; loli ikyo kitikukipákisya ikyene. Ugwe kufimbilisigwa ukwitikisya Iki, gwimwene. Ikyene kibagíle ukuya ugwe!

221 Lilino ngimba umwe mwitendekisye? Fyusya ikiboko kyako, yoba, “Une nítendekisye. Une nítendekisye ukufwa papapa apa.” Lilino komma ukubomba ikyene pene pápo ugwe kusanusya ikyene. “Une nítendekísye ukufwa papapa apa, pamo ukwéga ifi une ngulonda ukufuma kwa Kyalá.” Ameni. Ngimba umwe naloliloli mwitendekisye?

222 Polelo unko ikilundilo kíme, kulikosa. Lilino palikimo, palikimo, unko uswe twibúngàne twibene palikimo. Unko uswe twipute. Kangi unko uswe itolo... Umwe balumbilili lilino endaga ukufika ku bandu aba apa, aligwesa, kangi ugwe kwimilila amaboko ga Kristi lilino.

223 Ugwe gwe kulonda u Mbepo Mwikemo, ugwe uyu ikulonda ubwendelemo bula, komma ukunyenemusigwa mwakitima; ugwe kulonda u Mbepo Mwikemo, u Bumi, indumbula ya Bumi nkati mwa ugwe. Kangi ugwe kulónða ukusósyámo kula ukwíyíbwá kúko kukupela ugwe—ugwe ukabagíla ukwílingánia gwímwène; ugwe utikumanya kúko ugwe kwíma; ugwe ukamanya iki ugwe guli; unko uswe tusosyépo ikyene lululu lilino! Bulipo u Bupápígwe ubupya apa kuli ugwe, ubwáanalòli, u Bupápígwe bwanaloliloli ubupya.

224 Lilino unko uswe tubíke amaboko gítu pa bándu aba. Unko uswe, aligwésa, fyúsya amaboko gítu nukwípùtila nu lufwáno lumolwéne.

225 Tāta Gwakumwanya, mu Ngamu ya Ntwa Yeso, tupaga, Ntwa, ukuti mu Ngamu ya Yeso Kristi, ukuti u Mbepo Mwikemo ikwisaga ikilo iki, ikilo kya Mpyagilo iki, kúko u Mbepo Mwikemo ágwíle ngati u mbelo ugwamaka umbopabopa. Abándu aba bali ósigwa mwa Mbepo Mwikemo. U Moto na Maka ga Kyalá gulisitaga ukubaleka abene. Linga abene bali apa ndubunju, balisyalaga abene, ukusyala mpaka u Mbepo Mwikemo ikwisa.

226 Iyo yo fundo! Ikyo kyo kyene! Pala Ikyene kili. Uyo yo Mbepo Mwikemo ikwisa. (Une mbombile ikyene. Une mmenye ikyo.)

Ikyo kyo kyosa. Itika Ikyene lilino! Itikisya Ikyene! Yaga bisúsígwe ni sayo Syáke. 

64-0411 Kwĩyĩbwa Kwamwāmbèpo
Kubupayilo Bwafwabwite Kwa Basikali Bakikolo
Birmingham, Alabama U.S.A.

KYANGONDE

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org